

四庫全書

史部

欽定四庫全書

史部

山西通志卷一百五十四

五四

詳校官給事中臣王鍾健

檢討臣德生覆勘

總校官進士臣朱鈺

校對官庶吉士臣吳裕德

謄錄監生臣蔣傳馨

欽定四庫全書

山西通志卷一百五十四

列女

六

朔平府

右玉縣

明

舍人歐英妻王氏幼而淑靜年十九夫亡欲自殺以殉
家人守之不得一日給以洗沐遣守者去遂閉戶自

縊都御史李敏為之請旌有日月爭光山川出色之句

儲徵妻何氏年二十四夫故遺女二女紅治生守節六十年卒

尉章妻王氏章耕於田為部人所掠氏年十有八歲母令改適氏勿聽與母絕往來異日母至門見氏為隣媪舂米斥之曰汝不吾從今自苦乃爾氏不答遂投井死

孫可學妻曹氏年十九夫亡撫子既而子死家益貧冰
操益厲壽八十卒御史白題旌

趙針妻張氏年十七夫亡哭之慟給家人曰治棺宜寬
吾將盡納夫之遺物也越日乃自縊家人哀其節因
同柩殯焉御史旌之

徐世卿妻李氏年二十三夫亡三子幼勤女紅育之三
子胥成事母盡孝御史旌曰節孝之門

歲貢敦士宏繼妻楊氏士宏任雲南提舉卒於官氏年

二十六萬里扶櫬歸葬事八旬繼姑以謹順聞課子
邀恩選學使奏旌

巨經妻李氏年十九夫亡守節翁謹陣亡負骸還葬巡
按周旌其門曰節孝卒年七十有八

馬承學妻柴氏承學被溺死氏痛不欲生即自縊

崔守仁妻原氏守仁經商卒於旅邸訃聞氏投繯死

右衛千戶黃達妻趙氏年二十一夫亡矢節撫孤卒年
七十有七未嘗與僮僕親授受

玉林衛百戶劉清妻劉氏年二十六夫亡子彪方四歲
氏撫成娶周氏彪亦卒周氏年二十一與姑同守志
操凜如水霜

生員李委蕢妻宋氏年十九夫亡事翁姑盡孝撫遺腹
子貞儒成名並撫二孫苦節以終

玉林衛指揮楊約妻王氏年十七夫亡生子一日雙瞽
父母遣嫁守死無二

玉林衛百戶王相母柴氏年十九相父故後三月遺娠

誕相事姑撫子以壽終撫按旌表其門

右衛指揮麻富妻王氏年十九夫没王事姑茹苦守節
撫子成名撫按旌曰忠節雙全

右衛千戶姚國都妻王氏年十九夫故家貧姑欲嫁之
氏曰姚氏無後余方娠三月不忍去也後生子名世
官撫成襲父職

副使何廷魁二妾金氏高氏廷魁分巡遼陽城失守率
二氏投井死婢僕從死者六人

趙登仕妻王氏年二十餘寡家貧無子倚季壻供井臼
季女復早折孀居逾四十載旱乾水溢烈風凍雨凜
如一日過其門覩傾側蕭瑟狀無不哀惻之者年七
十卒

周權妻樊氏王鳳妻孫氏王朝臣妻張氏范佑妻李氏
玉林衛胡清妻董氏右衛百戶王輔妻汪氏右衛指
揮周維藩妻張氏右衛正指揮史闕文妻折氏生員
李先香妻趙氏以上俱守志節

國朝

楊氏正黃旗滿洲領催胡都納妻康熙三十五年胡都
納在招磨多軍前病故氏年二十五守節三十三年
雍正六年疏請旌表

王加氏正藍旗滿洲護軍馬成妻康熙三十五年馬成
在招磨多軍前病故氏年二十九守節三十三年雍
正六年建坊旌表

關加氏正藍旗滿洲護軍伊達禮妻康熙三十三年伊

達禮在招磨多軍前病故氏年二十九守節三十三年雍正六年建坊旌表

焦加氏鑲藍旗滿洲護軍四格妻康熙十三年四格陣亡氏年十九守節五十五年雍正六年建坊旌表

高氏正藍旗蒙古護軍牙圖妻康熙十三年牙圖病故氏年一十八歲後隨子偏圖來右衛駐防守節五十五年雍正六年建坊旌表

達祿氏鑲藍旗蒙古領催杜楞妻康熙三十五年杜楞

病故氏年二十九守節三十三年雍正六年建坊旌表

高氏鑲藍旗漢軍于朝選妻康熙三十五年朝選病故氏年二十九守節三十三年雍正六年建坊旌表

宋氏鑲黃旗漢軍廕生田璋玉妻康熙三十五年璋玉病故氏年二十守節三十三年雍正六年建坊旌表
王氏鑲白旗漢軍王應登妻康熙十五年應登病故氏年一十九守節五十三年雍正六年建坊旌表

羅氏鑲白旗漢軍王可良妻康熙三十五年可良在招
磨多軍前病故氏年二十六守節三十三年雍正六
年建坊旌表

王加位妻高氏年二十七夫亡子章甫週歲撫孤守志
久而益勵雍正九年旌表

劉生藻妻安氏年二十九夫亡撫孤守節堅操粹白雍
正十年旌表

監生徐建格妻褚氏年二十三而寡無子冰蘖矢志終

始不渝七十九而終

知縣范鼎鉉妻趙氏貢生范台鉉妻陳氏己丑姜瓖之
變同居左雲川衛賊攻城亟二氏相戒弗受辱城破
各抱幼女投井死越數日出具屍面色如生女俱在
抱其時左衛城中井皆填滿惜湮沒不傳

把總楊叢泰妻原氏康熙三十五年叢泰從征噶爾丹
沒於陣蒙

卹典贈廕氏年二十九守節三十四年事育盡道宗黨

賢之

鄭材妻馬氏夫早歿撫子永春守志子復中天儼居人
舍勤女紅自給里中富翁某慕其賢謀娶為繼室所
親咸慙憑之氏堅志不從力營度日卒年七十餘鄉
黨憐其節共為殮葬

生員張杰繼妻劉氏夫臨卒以氏幼令其改適氏不從
撫子守志數十年如一日

楊世寶妻丁氏年二十三夫亡無子撫姪為嗣苦節歷

四十七年卒

劉成名妻王氏年二十六夫亡家貧苦節撫子戢甫入泮復夭折又撫幼孫承漢成立

俎復興妻韓氏年二十二歲夫亡無子夫弟二俱幼氏清苦持家俾得成立居有古樹一株枯久復榮人以為節義之感

田裕國妻石氏裕國病卒子述聖甫六齡氏誓不獨生三日夫歿自縊柩側

楊有英妻王氏年一十八夫亡撫遺腹子先春守節四
十一年卒年五十九

范鳴英妻王氏年十九夫亡家貧子幼矢志節歲饑
子死貧益甚卒不易操壽八十卒

生員趙登仕妻王氏年二十四夫亡無子食貧守志歷
五十年卒

劉氏鑲紅旗漢軍協領徐嘉英妻嘉英於雍正五年病
故氏年三十六歲即投繯殉之

趙氏鑲黃旗滿洲防禦世襲拜他拉布喇哈番常祿妻
常祿於雍正九年病故氏年三十四歲即投繯殉之
任義妻廖氏義卒矢殉夜半人盡寢潛出縊柩側

王懋德妻李氏王明德妻解氏劉起福妻張氏程起瑞
妻徐氏辛鳳彩妻韓氏王化行妻王氏庠生殷顯宗
妻劉氏庠生周孕彩妻賈氏生員原啟仁妻郝氏成
師友妻張氏庠生王之正妻樊氏冀屏妻胡氏馮三
元妻曹氏安仲妻王氏逮迨妻胡氏王忻妻吳氏張

應輔妻閔氏王大徵妻蘭氏以上俱守志節

朔州

北齊

斛律氏鉅鹿郡公斛律光長女樂陵王百年妃時災異
疊見帝將以百年厭之使召百年知不免割帶玦留
與妃別見帝擊死瘞之妃把玦哀號不食月餘亦死
玦猶在手掌不可開時年十有四歲

元

賈賢妻劉氏年二十餘夫亡子二長福義年六歲次福禮在乳哺氏誓不二天勤女紅以供祭養筑居五十餘年至正間旌表

明

王幹妻李氏正統間幹從征陣亡訃聞氏哀慟欲絕設靈几祭奠訖出金百兩寄幼女於侄遂自縊聞者莫不嗟悼詔旌

指揮方諒妻董氏年二十八諒卒無出誓守以奉舅姑

曰二親老矣是泉下所不瞑目者朝夕承歡二老忘其無子及舅姑沒鬻奩具營葬敬庶姑林氏如姑苦節三十三年成化十年旌表

武敏妻董氏年二十五夫亡守節四十餘年撫子仲傑有成仕秦府長史成化十年旌表

李通妻趙氏年十八夫亡欲自盡姑曰爾幸有身得男以繼夫後夫不死矣若女也當聽爾志已果生男繁矢節撫姑成化二十三年詔旌

千戶董儀妻錢氏年二十夫亡遺孤在襁褓守節三十
六年撫孤成立弘治間旌表

雷頤妻高氏事見雷節婦傳有碑坊

總旗劉勝妻王氏勝從征沒於陽和後口氏年二十五
遺孤鑑鉞胥幼計聞氏觸死柱下尋復甦守節四十
八年撫二孤暨孤姪威咸底於成弘治五年詔旌其門
郝讓妻師氏年二十夫亡無子晝夜悲號齋食營殯
事殯畢遂自縊

舉人郝紀妻楊氏紀病氏默禱願代紀卒氏年二十餘
每謂所親曰計惟一死奈堂上二老何事舅姑生卒
盡禮孀居三十五年正德間旌表

牛茂妻蔚氏年二十餘夫亡遺子珍幼撫育成立守節
五十餘年

周廣妻丁氏年二十夫亡遺子三氏遇之嚴稍長就外
傳日必自課其業三子畏憚如嚴父長宗以國子生
任吳堡縣令次俱成立孀居五十餘年節高而才尤

足稱

舍人李宣妻張氏年二十一夫亡子鳳引在抱撫訓成
立任太原學博巡按旌之

王國臣妻徐氏國臣業攻金虧折官銀賠補不給歸而
謀諸婦欲脫簪珥以償之氏有德色國臣飲毒死氏
追悔自縊奏聞旌表

侯國妻盧氏早歲失怙與嫠母垂髮作苦及笄適國不
數年國亡家素清貧苦節三十年訓子養桂力學食

餽內外賢之

許士連妻朱氏少寡家甚窘日午不爨冬無完褐氏茹苦守志撫孤應科第有成孀居三十八年卒

盧天保妻倪氏年少有姿夫耨田氏往饁之道為惡少楊一山所迫氏以死拒歸訴其事欲自盡時幼子在抱姑慰勉之氏意不少回卒雉經死一山旋即正法知州翁應祥為之傳

生員謝北闕妻雷氏少寡甘貧守志教子璋列歲薦當

事旌之

生員李敬伯妻王氏年二十三夫亡食貧守節始終無間有司以孝姑化婦教子訓孫奏聞旌表

蔚日昇妻盧氏年二十四夫亡家貧日不再炊力傭度日年六十七而卒

生員王承統妻馬氏少寡守志歷三十八年里中稱為節孝婦

殷體智妻孟氏夫亡守節歷四十年諸孤俱克成立

國朝

馬呈池妻孟氏年二十夫亡遺幼子二姑病臥氏自啜
糟糠啖姑以甘旨苦節五十餘年教二子東伯東陽
胥登鄉薦順治九年建坊旌表壽八十九東陽妻雷
氏亦早寡事姑以節孝聞

王善教妻劉氏夫亡誓守夫兄善績迫之轉適氏不從
投井死雍正八年旌表

庠生盧顯祖妻高氏年二十七而寡家計蕭條撫子女

備極艱難壽八十四而卒

廩生鄭煜妻李氏年十九夫亡無子誓養舅姑孀居三十餘年

羅世弼妻張氏幼嫻閨範以婦德聞於鄉世弼卒氏年少無子即自縊舅姑救之甦涕泣以諭氏自悔失計曰舅姑已老無他子婦侍養妾復自盡是速舅姑之亡也自是忍死侍奉翁沒力襄喪葬姑失明色養尤謹守節四十餘年卒

陳大明妻李氏少寡子儒在抱有奪其志者氏嚙指滴
血矢死儒長娶婦落氏落年二十有三儒亦卒誓守
姑志撫子乾佑有成人稱一門雙節

董宏祥妻趙氏結褵八月宏祥卒誓不再適守節逾六
載忽有媒氏求婚者至氏歎曰少婦守志多不諒於
人不如死之遂自盡

生員劉屏妻解氏年二十夫亡哀號欲殉其弟梓方慰
勉而止事老姑撫藐孤曲盡其道孀居六十二年卒

年八十有二

庠生蔚增妻閻氏監生盧之治妻郭氏孟之鎔妻閻氏
廩生盧干城妻蔡氏王鼎冕妻楊氏王待聘妻李氏
雷溥妻李氏解乾妻劉氏以上俱守志節

馬邑縣

明

陳廷貴妻趙氏年二十四夫亡子方三歲守節撫孤力
女紅以自給萬曆三十四年詔旌

生員袁天瑞妻張氏縣佐張璞女幼有志操天瑞亡誓
不再醮子勲娶陸氏知縣陸宗女宗與天瑞友善憐
勲孤以女妻之已而勲亦天陸矢志節如其姑

舍人張祥妻韓氏年二十九夫亡守志四十五年鄉人
欽其節操

生員李寵妻杜氏年二十夫亡撫孤守節終身無玷
廩生霍鉉妻王氏鉉早逝遺幼子紹芳撫成由明經任
河間府經歷享年九十奉詔旌表

太學生霍毓芳妻盧氏給諫時泰女毓芳父官侍御卒
於京毓芳扶柩歸旋亦卒子女五人胥夭折會闖寇
焚掠家中落水霜矢志歷四十三年卒

國朝

廩生張調元妻鄭氏調元父備兵薊州死於難調元偕
兄同奔難所購父屍歸葬未幾調元悲憤成疾卒氏
方少艾仰天大慟曰吾翁死於忠吾夫死於孝吾雖
婦人獨不能死節乎投繯飲藥胥為家人所救解砥

志四十餘年歷任長令咸旌獎之

生員陸奇謨妻陳氏年十六歸奇謨越三年奇謨卒遺孤既治甫週訓讀成名復早折治妻他適撫四歲孫苞依姪居處年七十有九卒

廩生李承基妻白氏早孀遺孤五人皆幼氏苦守撫之以長以教學胥有成列庠序家貧各授徒他所氏從之東西就養迄年六十餘始與仲子歸邑終老

廩生張芳譽妻齊氏年二十二夫亡遺子未週撫守十

二年子亦繼天氏志堅金石歷久不渝長吏旌其門
廩生李肯堂妻段氏廩生鄭九成妻郭氏監生霍煜之
繼妻張氏霍燕妻閔氏以上俱守志節

左雲縣

明

指揮使范安妾楊氏宣德中安戰沒氏欲殉家人止之
氏曰吾欲從一而終爾阻我何為竟死事聞表其烈
行誥封恭人

祁信妻范氏夫早逝事姑以孝聞撫孤成立年八十卒
有貞節堂詩文

指揮李英妻畢氏年二十六夫亡守節四十餘年無事
足不踰中門御史陳天祥奏旌

劉璽妻蔡氏夫亡七日不食求速死不得越數日縊於
堂

張大倉妻宋氏夫患瘡貧甚氏傭針指醫藥三年無倦
容夫歿姑欲奪其志氏佯諾晚縊於室事聞詔旌其

門

何志高妻黃氏夫亡自縊以殉事聞詔旌

指揮張壘妻劉氏年二十二夫亡守節三十二年事聞

詔旌

樊端妻郭氏端沒自縊巡按李旌其門

生員虞宜妻張氏宜正直忤當路死氏食貧守志歷三

十年義夫節婦鄉評重焉

張大用妻王氏年十七夫亡守節四十五年

指揮王輝武妻丘氏夫亡誓以死殉母多方慰諭卒不能奪尋自縊

監生王宗伊妻鄭氏年二十夫亡無子守節終身御史湯題請建坊旌表

張鉞妻盧氏吏目王昂妻張氏韓武妻李氏千戶陳君寵妻潘氏李季春妻周氏陳宇妻許氏庠生張嘉言妻丁氏以上俱守志節

國朝

何鍾秀妻蔡氏年二十夫亡甘貧守節壽九十餘卒

吳承印妻趙氏年二十五夫亡撫遺腹子成立守志終

身

馬安世妻梁氏年十九安世卒事舅姑俱登八旬有餘

撫子子亡撫孫孫亡更撫曾孫苦節五十餘年

李福妻潘氏趙君顯妻王氏劉業鴻妻穆氏李見龍妻

張氏以上俱守志節

平魯縣

明

官舍張斌妻龐氏年二十餘夫亡遺子三歲守節撫孤
年逾六十卒

官舍于嵩妻李氏年十九適嵩生子甫五月夫亡姑亦
早孀相依撫孤俱享永年

生員李紹忠妻仇氏婉婉有婦德家素貧事翁姑不遺
餘力紹忠卒絕粒三日自經柩側

高通妻溫氏少寡子女胥幼依兄嫂居令他適氏涕泣

明志兄嫂終迫之氏撫子女訣曰我躬不閱遑卹我
後遂投繯死其子女亦即自經叔溫廷乃訟之官論
兄嫂如法旌其節

國朝

井坪參將佟國仕妻遼東人失姓氏順治五年姜瓖遣
偽將周世德夜襲井坪佟聞變巷戰死賊入署氏登
樓發矢矢盡墜樓死

王壁妻李氏年十七夫故家貧姑母並勸之嫁氏不從

姑潛許配某娶有期氏聞自縊衛守以報府比官至
檢驗葬已數月啟棺面如生人驚異焉

井坪武棟魁妻靳氏年二十五甫生子魁南遊不返遺
書令改適氏持書涕泣誓死不二魁卒旅邸苦營路
費命子覓骸歸葬子尋卒無後守節四十餘年里人
哀之

范憲文妻孫氏庠生朱來紱妻燕氏李良弼妻安氏穆
宗妻張氏韓錫章妻王氏劉中魁妻楊氏翟起功妻

崔氏營兵劉天福妻韓氏張萬才妻盧氏毛凌霄妻
盧氏庠生黑待旦繼妻李氏王滿銀妻李氏陸敏公
妻龔氏楊烈妻薛氏吉兆星妻劉氏以上俱守志節

寧武府

寧武縣

北周

閻姬宇文護母報護書曰吾共汝在壽陽住時汝叔母
賀拔兒元寶叔母紇干兒菩提及汝姑兒賀蘭盛洛

并汝身四人同學博士姓成為人嚴惡汝等四人謀
欲加害吾共汝叔母等聞知各捉其兒打之唯盛洛
無母獨不被打其後爾朱天柱亡歲賀拔阿斗泥在
關西遣人迎家累時汝叔亦遣奴來富迎汝及盛洛
等汝時著緋綾袍銀裝帶盛洛著紫織成纈通身袍黃
綾裏並乘騾同去盛洛小於汝汝等三人並呼吾作
阿摩敦如此之事當分明記之耳今又寄汝小時所
著錦袍表一領至宜檢看知吾含悲戚多歷年祀

明

寧武總兵周遇吉妻劉氏俠烈有丈夫氣逆闖圍太原
氏語夫曰公受國厚恩當盡死力以報朝廷周領之
率部下士赴援及太原破賊趨寧武周守禦力窮墜
城死氏部分男女僕從持弓矢列陣廳前積薪屋後
爇待之賊入應弦斃者纍纍矢盡闔門投烈焰死

潘政妻施氏寧化所人夫亡守節子姓四世同居氏親
為撫訓孫右同登進士歷官布政司參議人謂施之

遺澤云奉詔旌表

國朝

陳大勛妻姜氏年十七適陳二十四而寡守節四十餘年撫子成立雍正八年題請旌表

生員廖鈞妻李氏靜樂丞李室之女年二十三夫故苦節四十五年壽六十有八卒雍正八年題請旌表

偏關縣

明

張剛妻王氏年十六歲夫疾篤求以身代及卒欲自縊
家人防護甚周守節五十七年卒年七十二歲

常齡妻黃氏千戶黃壘女年十六歲適齡三載齡卒困
苦守志或憐其貧周之亦不受撫二子成立年七十
八歲卒

千戶王懋德妻李氏年十九懋德卒撫孤守節孀居六
十年壽七十八乃卒氏姑黃氏亦以節聞督撫扁其
門曰雙節凌霄子維城官都督

遊擊常祁妻楊氏祁陣沒氏聞訃哀號絕粒旋投繯自
盡家人救免當道旌其貞節歲給廩米一十二石

庠生任桐妾王氏桐故氏請於桐妻郝氏曰家貧無養
守節不能改適不可吾兩人不若殉夫地下相持大
慟同縊棺側郝繩斷墜地復蘇王即殞命時年二十
九歲

庠生楊佳珍妻萬氏年十九夫故一女亦殤氏絕粒七
日不得死家人慰諭之乃育侄為嗣苦節七十餘歲

王英妻邢氏千戶王麒妻黃氏百戶華三祝妻孫氏庠
生童可進妻賈氏遊擊梁汝貴妻杜氏庠生王國琛
妻柳氏以上俱守志節

國朝

監生薛文耀妻顧氏江寧人連平知州顧如賢女年十
七適文耀踰七載文耀客都門卒訃聞慟絕傾奩攜
子詣京殮骸歸里家中落仰事俯育數十年勞勩備
至舅姑歿竭蹶營葬並祖姑叔妯喪而為六觀者歎

息文耀從弟文熙暨侄女二俱失怙恃氏撫如己出
咸得有成雍正七年建坊旌表

庠生萬錢妻孫氏大司馬萬世德孫婦也年十九夫故
守節四十年姜瓖變殉難焚死

王翊鼎妻宋氏鎮西指揮使宋興女姜逆之變鼎隨父
投河死氏日夜號泣絕飲食者四日因自縊時年一
十有九

萬年圖妻馬氏圖沒於軍氏曰夫既沒我將何從遂投

縲以殉

儒士馬士騏妻王氏年十八夫卒子驤未週氏冰蘖撫孤雛稍長嚴課督弱冠即食餼於庠當道咸旌其節卒年六十餘

營兵毛宏吉妻屈氏宏吉調防吳越行月餘復調妻子偕往氏泣曰婦人無夫獨行數千里即見夫面能保其為完人乎不若以一死謝之遂自縊

營兵趙自旺妻胡氏奉調南行氏與毛宏吉妻屈氏同

日自縊

李毓奇妻鄒氏年二十四夫卒無子女孀姑垂老氏立志侍養撫姪以嗣夫勤苦操作處人所不堪鄉黨咸推重之

郭鼎妻王氏年十五適鼎甫一年鼎出遊卒事翁姑貧不失養遺孕三月生子鎮蕃育成之每以鼎屍未歸為恨臨終猶囑鎮蕃求之

高揆妻史氏年二十一揆卒姑憐其少且貧諭改適氏

絕粒求死姑慰而撫之織紵養親憂勞早卒

韓五典妻馮氏早孀無子女家極貧氏飲水茹荼苦節
終年

杜繼曾妻鄒氏白自旺妻張氏監生薛文煜妻呂氏萬
中遴妻張氏李治妻王氏高通明妻鄔氏史湧妻張
氏沈泰運妻梁氏郝豫妻劉氏庠生張轍妻史氏韓
如琦妻刁氏王希才妻牛氏王風泰妻楊氏萬象新
妻曹氏孫上錦妻郭氏庠生高紹基妻杜氏趙國相

妻趙氏駢之驃妻李氏以上俱守志節

神池縣

國朝

李奇福妻劉氏年二十四夫亡姑孀子幼傭針指治生
計仰事俯畜胥得其道鄉黨以賢節稱

五寨縣

國朝

郭命宏妻李氏貧家婦也動循禮法素行貞潔康熙甲

午氏往掃墓道僻鮮人有張拐子者乘機逼氏氏格
拒不從遂殺於曠野事聞康熙五十年建坊旌表

岳林光妻喬氏年二十八夫故夜卧不解衣常佩利刃
以防不測光墓遍植松柏每暇輒攜子往視曰松柏
長青冬不變節不惟爾父魂有所依實與我心相似
守節三十四年雍正八年疏請旌表

庠生李朝柱妻賈氏年二十九夫故無子置木主於寢
室晨夕侍側每事必告而後行男子年踰十歲不通

言語守節三十三年雍正八年疏請旌表

澤州府

鳳臺縣

唐

徐氏澤潞將張伍妻封高平郡夫人伍鎮泗州病卒軍
吏欲立伍子重政為郡將徐氏號泣固拒不從德宗
詔褒之進封魯國夫人

金

劉璋妻樂氏年二十一夫亡遺孤長歲次止十七日耳
母家議令改適氏截髮誓守值貞祐己巳荒變中彌
堅苦節歷五十餘年鄉人扁其堂曰歲寒

元

陽城長官郭福妻關氏福沒於王事氏矢志四十餘年
行有法度至正間旌表

周氏澤州人安西張興祖妻年二十四夫亡舅姑欲令
改適氏曰妾家祖父皆蚤世祖母暨母並以貞操名

妾或中道易節是忘故夫而辱先人妾不為也遂棲
居三十年以禮奉堂上更主其父及外祖喪葬事人
皆難之事聞旌表

明

邢清妻劉氏清病疋氏來歸異居侍疾尚未合香清疾
亟呼氏訣問以所從泣應曰脫不幸願從地下比卒
遂縊而死弘治中旌表

孟誠妻高氏年二十五而寡生子泰七歲待食機杼撫

孤自守泰娶王氏生子鑑泰亡鑑娶牛氏生三子彪
錦欽鑑亦沒兩家父兄憐其貧均欲奪之王曰吾姑
為節婦矣牛曰吾姑繼祖姑為節婦矣矢志堅貞後
先如出一口皆年七十而終里有三節堂後孫官侍
郎曾孫陽行人以諫死咸為名臣忠節萃於一門

范蒲妻梁氏適蒲甫匝月蒲暴卒氏年十八誓以死殉
母令姑同氏寢氏伺姑晨起即投繯自縊嘉靖間事
聞立祠以祀

李孟冬妻宋氏嫁一載而夫亡歸寧母受富室厚聘促
改適氏志不從母讓之以釜擲氏面歸白翁更衣闔
戶引刃斷頸尸立不僵遠近聞而悲之隆慶初立祠
以祀

焦廷器妻韓氏年十七于歸甫三日夫暴亡氏襄葬畢
旋即縊死

兵部司務郭環妻張氏環卒於官子志學甫七歲志仁
在襁褓氏攜孤扶櫬以歸既葬躬紡績課二子攻苦

力學相繼登第不獨貞行為高義方充足尚云

李朝元妻毛氏事繼姑稱孝年二十二夫亡子一在抱
一方娠苦節六十餘載當事旌之

生員侯秉醇妻郎氏夫亡痛絕復甦屢以死殉翁姑父
母陰謀奪其志氏聞勺水不入口者三日死之奉詔
旌表

舉人張翰妻焦氏翰卒矢殉弗令人知也蓋棺畢入閤
櫛沐雉經當事有女中丈夫之扁

庠生劉孟津妻王氏年二十三夫亡撫在抱子入庠歷六十年艱難困折兩目俱盲又有朱氏者庠生劉孟濱妻也亦苦節四十餘年歿當事以雙節旌其門

毛炳然妻王氏炳商十餘載感疾歸臥不能言動氏典器服搆醫藥手滌廁牖數年不懈炳歿觸頭出血幾絕籍紡織以資膏火教子俊民著名庠序事聞旌表
党鳳妻張氏年二十二夫亡誓不更志倚織自饒教育孤子閨閫肅如事聞旌表

輔國中尉朱充儻妻魏氏夫卒氏晝夜號哭死

韓表妻裴氏夫亡栢舟自矢閨門謹嚴終其身寂如也
詔旌其門

庠生李大隆妻邵氏隆卒京邸氏年二十五聞訃即欲
自經所親力勸之撫子守節歷三十五年奉詔旌表
趙汝鳳妻魏氏年二十四守志撫孤騰躍早卒又撫
孫萬國備嘗艱苦壽八十四歲院守旌之後四十年
趙日映繼室苗氏年十九而寡無子事孀姑及姑卒

躬自營葬四棺纍纍痛感道路郡守亦扁旌焉

舉人孟思妻鍾氏二十歲撫子履約約妻馮氏二十一歲撫子士貞庠生貞妻王氏二十六歲妾甯氏十七歲偕撫子璋璋早卒撫三日孫淑一門四節鄉黨稱賢

貢生張焯妻李氏年十九夫亡撫子祖廕入庠奉詔旌表廕與蠡縣令王采殉城難妾申氏撫孤入郡庠究以未獲廕骸痛悼卒

劉鳴鷺妻李氏宗禎間流寇掠大陽氏攜二女長成憲
西妻次田饒妻一侍婢倉皇出走道遇汚池謂二女
曰我等女流將焉適不如入此全身遂同二女侍婢
投池死

李尚隆妻韓氏隆死未葬遽遭流賊肆橫民人逃匿山
谷氏獨潛牆壁中守柩賊入室柩焚氏縊死壁內

關天廡妻田氏偕妾楊氏十九歲撫週歲孤入庠遭流
氛遇害

段烈女父如錦年十四歲宗禎五年為流寇所擄女奪賊佩刀自刎死

孝子趙友益妻安氏馬負圖妻周氏張重光妻馮氏庠生張燮妻靳氏義官董思壽妻耿氏段一宗妻李氏張一桂妻郭氏庠生石文炳妻趙氏侯侃妻康氏田鐸妻王民生員李長盛妻裴氏生員郝訓妻王氏任中輔妻劉氏關守智妻連氏王納言妻任氏奉國將軍朱聰澇繼室李氏朱充箕妻王氏鎮國中尉朱俊

蒸妻李氏著丞段廷黼妻魏氏段居讓妻龐氏王堯
臣妻姚氏以上俱守志節

國朝

岳尚武妻司氏年二十夫亡紡績謀生十指穿血教子
峻極成名巡按旒旌

生員孔銓妻毛氏結褵五月銓卒氏慟絕投繯侍婢嚴
衛之忽曰若輩不須防我我俟遺腹男女何如耳治
夫墓則繩度尺寸計容兩棺臨期生女朝夕痛哭日

進米汁一盞兩月而卒巡按疏請旌獎

官廕生張中驥妻陳氏年二十二夫亡呼搶欲死方抱
娠姑以存祀諭及期果誕子撫成廕官監三喪未舉
卜塋禮葬之康熙四十一年建坊旌表

張貞女許字苗咨未婚咨卒貞女奔喪守志孝事孀姑
姑亡葬訖乃不食死雍正九年旌表

張元孕妻王氏年二十一夫亡無子與孀姑相依後姑
欲改適氏痛哭留之不從猶餽衣食歿姑身乃止

參政張光奎繼室李氏二十四歲撫子茂琨茂琨妻李氏二十七歲撫子廷鏞廷鏞妻尚氏偕妾劉氏年二十撫子淮入郡庠三世四孀白首矢節

生員王會極妻裴氏闖賊索金拘其翁氏脫簪珥出之尋翁遭誣禍不測氏投繯為家人知救免復蕩產白翁冤子化美入郡庠

時世英妻崔氏年十九夫亡奉養祖姑育數月遺孩尋天鬻奩易室營葬四暴棺七十餘歲惟圓泥丸給養

里人憐之

李養德妻畢氏養德貧苦以種菜為生養德卒氏孕已半載焚香告天縊死柩前

史揚芳妻蘇氏子女俱無年八十餘奉養一百八歲之老翁家貧日走士大夫家博少許酒肉進翁起居輾轉氏晝夜扶掖不少離

李化國妻原氏年十九夫亡遺孤彙征甫九月孤孀無籍家業悉為豪奪至不能餬口彙征入泮早亡復撫

孫甘心窮餓百折不回年九十三卒

舉人張應嵩繼妻焦氏年二十二應嵩卒於客誓以死殉家人防衛嚴不獲葬畢不食死

張貞女父廣土幼許聘徐弼世弼世卒女請往弔母不許後改字范姓子羔雁至女始知痛哭欲縊母曰我耄矣兒若此我請先女唯唯厥後昇至范門止不進疾聲謂范父曰我徐家婦何強逼為也我隱忍至此者為母老耳遂去吉服裋縞素上下縫紝不可解觀

者百十人范願退婚送至姪家次日而返至弼世忌
日向墳頭哭奠託易服拜公姑執婦道甚恭歲餘卒
趙良富妻苗氏良富貧賣炭營生傷力卒氏誓不獨生
母謹防之至殮日謂母曰彼將就木我當往視之久
不返覓之自縊溝中樹上矣

朱明紘妻王氏年二十一夫亡甘貧守孤子尋沒氏痛
哭曰我久不死者為朱氏延此一脉今何望哉遂不
食九日死

張子脩妻段氏年二十二夫亡乘隙縊於柩側紳士公誅之

孔得貴妻焦氏裴述臯妻李氏張國治妻趙氏生員張奇珍繼妻王氏裴秉彝妻王氏大理寺卿張光前妻朱氏生員張肇興妻宋氏田光耀妻王氏庠生田種金妻王氏王嘉謨妻韓氏霍世科妻王氏秦時泰妻朱氏生員郝紹芳妻郭氏劉雲鵠妻趙氏王國明妾張氏龐士傑妻顏氏邵師尹妻楊氏樊養能妻謝氏

段絨鳳妻劉氏陳策妻苗氏生員喬民信妻王氏張
嗣昌妻孟氏劉永貞妻韓氏生員李楷妾李氏建昌
令丁其泰妻李氏生員段萬鍾妻任氏張茂晨妻宋
氏尹芳妻司氏李興隆妻秦氏進士翟于磐妻郭氏
王順德妻趙氏生員何振繼妻申氏韓瑒妻侯氏生
員張暎妻孫氏監生張加侯妻孔氏廩生鍾世芳繼
妻朱氏翟于珣妻王氏監生崔鐸妻李氏宋黼皇妾
徐氏廩生李捷妻王氏張潤妻孔氏生員趙日章妻

喬氏生員陳英妻翟氏常佩璫妻劉氏苗登雲妻裴
氏申竒遇妻侯氏常友金妻牛氏董濬妻王氏趙昭
妻韓氏郭名顯妻魏氏常祿妻李氏宋養正妻張氏
監生趙廷對妻馬氏王海妻陳氏李學書妻王氏門
永和妻原氏馬洪瑞妻鍾氏張德俊妻陳氏郜儒妻
李氏陳泰妻王氏李必昌妻張氏范自省妻郭氏董
洪妻張氏尚錦妻朱氏王起志妻傅氏陳善妻古氏
趙良弼妻申氏王俊奎妻王氏馬雲蛟繼妻王氏段

雲鷺妾李氏宋璋妻霍氏生員葛秉忠妻馬氏劉宗
潤妻趙氏邱弼乾妻王氏張宿瑞妻王氏李文臣妻
王氏生員董維藩妻孫氏生員王容妻張氏朱錦妻
宋氏張二典妻原氏王廷相妻李氏史綸章妻秦氏
陳玉圖妻李氏晉宗周妻李氏范才喜妻王氏以上
俱守志節

高平縣

元

張珊妻曹氏年十九珊亡遺孤甫週歲姑先有贅婿李
姓者利所有陰與其妻謀願鳩兒以絕曹望曹心動
乃寄兒母家惇惇子立恪盡婦道以慰其姑凡五十
年所值李姓者死兒克成立壽九十終至大間奏聞
旌表

張國用妻許氏年二十二夫亡誓守奉姑泰定三年詔
旌曰孝節之門同邑又有段傑妻姬氏李鳳妻王氏
王平妻張氏俱著貞節泰定間縣尹郭質奏聞並旌

明

張友讓妻王氏年十九歸讓閱十年讓死苦守不移資
女紅奉姑教子足弗踰閥弗與宴會終始以禮六十
八終成化七年知縣崔璘奏旌之

李韶妻祁氏年二十三韶亡以死自誓舅姑欲奪其志
氏堅持不二內外稱之成化七年奏旌

王子章妻李氏章死氏願殉未果值兵亂攜七歲兒備
歷艱辛歷四十年晚節愈勵成化七年奏旌

邵深妻璩氏年二十深死端潔自持資織絰以供朝夕
邑有巨姓擇筵慕其賢欲致之屹不為動竟守志以
沒成化七年奏旌墓產紫芝二本縣令劉鳳池有詩
憑弔

邢琰妻李氏琰早死貧甚親黨以別醮諷之氏曰姑在
孰與為養者矢死無他竭力奉姑終老氏亦壽踰七
十有八成化七年奏旌

生員陳鳳妻李氏明經陳輔母夫亡子幼家計索莫守

志不踰倚紡織為命教子成立官漢陰知縣成化七年奏旌

李女幼受尚洗聘未娶洗往滇無歸志女誓不改適尋以禮歸尚門事姑篤孝洗竟客死典衣飾托所親舁骸骨歸為同棺之穴而厝苦守凡六十餘年卒嘉靖間邑令傅思明表其畸行立祠祀之邑人宮厝劉虞夔有贊

邢光裕妻郤氏裕負矢戍邊竟裹馬革氏典衣取屍歸

殯畢即縊柩前二女從死有司奏聞建坊旌表曰乾坤正氣

牛學禮妻張氏禮疾篤以百金付張曰為爾後日計氏自忖脫夫有不幸有死而已金何為學禮竟不起氏投繯柩前有司奏聞旌表

龐暘妻陳氏苦節四十餘年如一日萬曆壬寅遇覃恩詔表其閭復丁二人邑人馮養志志墓

舉人邢國庶繼妻趙氏適邢一載而寡年十九姑垂白

前妻二子待哺氏食貧勵節奉姑終身教二子成立
奉詔旌表

張朝相妻李氏生二子而朝相亡氏年十八艱虞萬狀
迄於成立長子嘉祥娶李氏次子嘉瑞娶賈氏後兄
弟相繼死一姑二婦誓共守節俱以垂白終

宮詹劉虞夔妾畢氏年二十一夔卒撫嫡子文徵於襁
褓誓死保護族子不得肆其螫卒全三尺孤以綿一
綫歷三十年不渝文徵以胄子官部郎疏請旌表

牛天賜妻梁氏進士牛翀元母年二十九而寡人不見
其啟齒性慙直苦守四十餘年受勅封依然寒素建
坊旌表

張珽妻王氏幼失怙恃育於嫂年十六歸珽珽亦少孤
依舅氏居氏婉婉順從門內雍肅越十載珽邁疾篤
慮婦少無依氏泣曰君脫不諱我豈獨生耶及珽卒
殮訖氏竟投繯死

李嘉言妻張氏李經邦妻王氏馮坤妻田氏李時漸妻

張氏姬佩林妻郭氏生員牛星妻薛氏郭守恩妻孟氏常太妻張氏郭思恭妻關氏李大勳妻王氏郭治禮妻畢氏何春妻王氏張孟秋妻李氏郝慶妻李氏李佩妻朱氏李彪妻王氏以上俱守志節

國朝

監生李棠繼妻田氏己丑夏賊人張斗光煽姜瓌餘燼澤潞騷然劫掠無忌氏避亂東莊煤窑賊薰攻甚急窑破執氏罵曰吾以名門女適名門豈從汝賊賊大

怒露刀脇之罵愈厲立斃及下時從賊者無不愧歎
輩攀桂妻張氏年十六夫亡撫兩月子負成立荼苦備
嘗閱年八十一士民立石

生員趙建紀妻王氏年二十五夫死投繯以殉遺一女
弗顧士林哀之

孝子袁潔母朱氏十八守節八十告終潔廬墓處縣令
某奉文立石志之

趙之秀妻程氏年十九之秀死無子姑以氏貧幼迫令

改適再四氏給以服除及期姑設計攜婦往女家道
逢數人目注氏氏覺謂姑曰已被細看往女家何為
別姑獨歸未至家長號一慟縊夫塚旁時年二十一
庠生李德恒妻秦氏年十六適德恒孝舅姑敬夫子姻
黨稱賢越十三載德恒病革氏泣語德恒曰君無為
我念我必以死殉德恒戒不可氏頷之及德恒卒殮
畢氏以頭觸棺幾斃矢志不變家人守之會氏翁痛
子感懷憑棺大慟舉家胥奔勸氏乘間自刎死氏兄

莫廉其實訟之官凡六閱月讞平始殯形容不毀面
猶如生

李永欽妻楊氏緹獻儒妻張氏陳尚志妻李氏陳紀妻
李氏胡璣妻常氏生員楊尚林妻秦氏生員李業偉
妻田氏陳緒妻李氏以上俱守志節

山西通志卷一百五十四

欽定四庫全書

山西通志卷一百五十五

列女 七

澤州府

陽城縣

明

段居仁妻宋氏年二十七夫亡姑吳年六十子會甫週
氏紡績為業養姑教子洪武間旌表

栗氏雙節栗文輝之二女長適宋貞次適王愈俱年二十而守節成化間旌表

李紹妻張氏年二十夫亡矢守淡泊自甘紡績為業弘治間旌表

原湖妻王氏湖家貧為傭一日夫出氏守二歲兒居窰賊乘隙犯之以刃脇不從縛其手足緣地滾磕罵不絕遂遇害賊亦旋獲知縣李立碑道旁曰王烈婦執義抗賊處

李守然妻張氏夫亡年二十子方八月家貧姑曹欲奪其節張斷髮誓不改適正德間旌表

栗實豆妻楊氏年十九夫亡無子一女在抱矢志不二家貧落魄依母氏為居備極艱辛屢經旌表

貢生郭九思妻楊氏名臣繼宗女九思亡二子昊昌幼氏撫之為慈母為嚴師昊昌俱登賢書督訓如童時雖女子而卓有父風云

生員原一揆妻謝氏早寡子泉博尚幼紡績訓讀泉博

娶王氏未幾亦夭遺孤其秉甫三歲王氏孝養孀姑
撫嬰成立當事表其閭曰姑婦雙節

舉人白所樂繼妻延氏所樂艱于嗣氏生子印奭甫五
齡所樂亡氏年二十九遭家多難茹荼鞠子未幾奭
夭孫方旭生甫十月子婦王年十九氏復勉慰少婦
撫育遺孤凜然著冰柏聲壽躋九十王亦七十方旭
官壽州丞

生員田壘妻原氏早寡二子實堅實粟俱幼嚴督之實

堅娶王氏又早歿遺腹生子士珍王氏與姑誓同守節巡按旌之孫曾多達者

李天育妻王氏義士王海女夫病革誓以身殉比卒哀毀出血水漿不入口殮畢遍拜舅姑姊姒所有服飾各以輕重贈遺自縊柩旁家人覺而救之稍甦曰我亡人也拚一死耳若奚救焉防稍疎竟縊死年二十四萬曆間建坊曰捐生從一

生員喬鳳鳴妻田氏年二十八夫亡遺孤彬樸俱幼為

婚娶成立無何二孤相次夭慰勉兩婦陳氏陳氏各
以節著歷五十餘年孤孫映伍遂成名州守徐芳傳
其事

孝子王冲妻劉氏冲十九從父淑陵官京邸病亡劉年
十七聞訃哀號更衣自縊家人救甦姑慰曰汝有遺
腹獨不為王氏一綫念耶劉意動撫子元貞成立天
啟間旌表

成朝寶妻吉氏夫亡年二十二兩孤幼姑趙亦孀室貧

如洗吉孝養終其身撫二子成立次子先歿長子年
七十一亦謝世吉復茹苦訓孫有聲崇禎間奉勅建
坊卒年九十三

畢婦白氏白鶴之女適畢方入門夫以祖軍清勾當起
解懼而自縊白即與同縊二柩並列入共哀之

史鐵妻崔氏夫婦孤寒傭工度日夫亡氏有姿鄉人爭
欲娶之即詣夫墓側自縊

燕國洽妻王氏年十六夫亡子方彌月茹荼撫之二十

載流賊突至被執焚掠一空百計欲污不從賊怒殺之白尚書所知碑墓

廩生李際時妻馬氏與夫攜二女避賊至沁濱夫尋相失賊至逼之同二女投河死

王增保妻畢氏為賊所執欲污之拒之甚厲刃加于頸終不從賊恚甚劓其腹罵不絕口而死

王桂妻李氏白巷民養賢女為賊得牽至上佛寨前呼曰與我若干金當釋此婦無應者賊與李曰無人贖

汝當從我氏曰寧死不從殺之賊退視其屍血染地
作白色

生員馬一乘妻李氏為賊獲鞭之不從乃投廁中復為
賊獲計不能脫給賊曰體污矣須浣河中賊尾其後
乘間入井賊恨甚下石而死

王烈女生員如秋女及笄與嫂私約曰賊來安往有死
耳比賊至家人競走二人闔戶同雉經

銀匠孔量妻李氏為賊獲賊曰從我勝於銀匠李罵曰

寧從銀匠肯從賊乎賊強挽之上馬渡河罵不絕口
至中流奮身投淵死

栗某妻劉氏窶人也有女年十四美而豔賊至懼污令
女先投井身從之俱死

燕國問妻李氏賊獲欲污之堅不從奮罵不輟立斃刃
下剖腹析骸寢為慘酷知縣李扁旌之

孝子李博妻延氏賊至博守父柩不去延聞變先自縊
死督學袁扁之曰三綱不墜

石廷章妻李氏弟庠生含章妻盧氏廷章亡李年十九無子以含章子作鼎為嗣甫彌月鞠育成立及賊至李被執不從割舌而死盧委身救護斷指遇害

楊棟妻張氏夫亡氏年十九子垂芳未週奉孀姑李氏溫清備禮者三十載值寇亂婦姑同日雉經死人兩義之

王質妻吳氏王實德妻徐氏舉人侯一律妻謝氏楊堯瑞妻李氏楊堯年妻原氏崔繼文妻栗氏崔繼夔妻

原氏生員郭光大妻原氏張克家妻凌氏張問明妻
田氏生員原一陽妻成氏衛天寵妻郎氏白儒妻王
氏知縣宋之范繼妻王氏成家妻吉氏生員李紹芳
妻白氏李養正妻張氏原江妻王氏陳漸妻王氏郭
塢妻孫氏路天寶妻齊氏李敦化妻田氏田應雲妻
潘氏生員陳珂妻賈氏張國泰妻王氏生員朱大化
妻王氏田志節妻賈氏田應選妻呂氏以上俱守志

節

國朝

生員張任妻王氏明難臣叅政徵俊曾孫女年十六歸
任結褵甫九月任感疾卒氏絕粒慟哭忍死俟舍殮
將自決姻黨勸進飲食命婢媪環守之氏佯盥漱櫛
緘起居如常時私檢遺奩以小物遺諸女奴密陳祿
衣手紉之餘悉緘封置給婢媪往造食以夫故組自
經後任死僅一日事聞建坊旌表士大夫詠詩成集
時復有石范二烈婦大學士陳廷敬為三烈婦傳

衛宗聖妻白氏嫻女訓婉執婦道孝事嚴姑甚謹貧不
聊生攜子就養母家得甘旨輒遺姑宗聖歿忍死百
日號泣請父母資棺衾葬具粗備中夜投繯死

郭進臣妻許氏年二十三夫亡撫孤天霽娶呂氏未幾
天霽亦逝呂氏年二十一子永寬甫五歲姑婦孀守
一節不移

儒士石基永妻李氏年二十餘基永以勤學賣志歿遺
孤甫二歲基永死之明日孤亦死李因畫納基永詩

文于棺中給姑寢自經以殉令都南旌之諸生韓蘓
為文記其事

儒士衛琦妻賈氏夫亡氏年二十三遺孤貞芳四歲舅
姑春秋高夫弟妹九人皆孱弱婚嫁喪葬胥氏身理
盡瘁四十載課子成進士受貶封及子卒撫雛孫又
又二十年俱獲成立壽九十有六

田世達妻粟氏年十七夫亡子女俱無誓從地下家人
謹持之乃髡髮毀容之死靡他八十卒

石可用妻白氏石可成妻張氏兄弟析居久張氏年二十可成亡遺孤方在抱孀嫠弱息相依為命無何可用亦亡嗣未立白氏矢志守節乃迎張氏同處風雨晨昏更撫孤雛子成二氏俱享永年

趙嗣敏妻崔氏年二十喪夫無子時夫弟嗣昌婦有娠氏默祝曰幸生男吾當育之後果舉子因以為嗣累歷大變貞操不渝

生員甯大良妻田氏大良遊學卒於京氏年二十五無

子依母家四十餘年冬夏一室鄰媪罕識其面歿之日歸無族葬無兆內姪宅中祔於祖塋為苦節吟十章哀之

李承培妻田氏年二十夫亡有遺孕誓無二志廬墓側三月生子攀龍孀居四十餘年撫孤成立邑令旌之曰守墓生子

生員田生福妻王氏年二十八夫亡遺孤尚幼家窮甚與夫孀節女弟寒宵共績雖大故不出閨閫茶苦七

十年近百歲馬子宅中有文

張象璧妻蔡氏崇禎壬申兩姑及夫並為賊傷年二十
三抱兩歲孤求三尸藁葬之賊平典衣飾并前亡舅
合窆焉晝夜紡績供子讀書卒致失明後子登甲午
貢元

張琦妻裴氏琦賈河南客死禹州裴聞號泣絕食數日
不死其兄具物祭琦氏曰姑待我家人防益嚴強之
食乃稍稍食以安之越日黎明自經死

馬艾志妻粟氏艾志為土崩壓斃氏年甫十七無子女
聞夫死悲號踰日別父母遂從容雉經

譚佳章繼妻王氏河南息縣人歸譚甫三載佳章病歿
氏墜樓幾殞姑多方勸救曰俟夫葬後送還家氏亦
恐以身死累姑給兄至與訣哭拜夫靈窺家人防稍
疎闔戶自經

庠生許思睿妻楊氏妾王氏思睿歿於江南之金山楊
氏立意殉夫絕食十數日而死王氏矢節撫孤終身

如一邑人田六善有詩輓之

曹怡如妻王氏歸二載怡如客死江西氏年十九懷孕三月誓死殉幸舉子貧困寄食兄嫂計反夫櫬仗十指撫孤鄉里稱之

儒士楊激妻張氏夫亡無子年二十四絕粒誓死其母以立後勸始進食嗣子殤復嗣一子冰蘖自持孀居十載母病侍湯藥稱純孝母卒竟不食死

生員白印恒妻衛氏田見祿妻陳氏恩生白文黼妻郭

氏生員白光昭繼妻范氏劉濤繼妻楊氏生員李和
妻田氏生員段上鳳妻吳氏田養仕妻王氏王道行
妻田氏畢倫妻吳氏生員王業鴻妻郭氏張元功妻
石氏生員王立心妻吳氏李春蔚妻王氏生員郭維
寧妻楊氏田體坤妻李氏趙夢豸妻陳氏監生張致
中妻栗氏衛遵志妻上官氏田志鯤妻閻氏原泉瀾
妻楊氏吳思孔妻白氏生員衛晉璧妻延氏成大祿
妻劉氏原遵妻潘氏生員張俊望妻王氏張啟芳妻

賈氏生員衛瑄妻延氏生員楊斗維妻喬氏恩生白
方厚妻王氏增生白象妻衛氏崔繼宗妻田氏劉
庚妻裴氏生員張瑢妻陳氏生員趙之錕妻暢氏楊
大叅妻延氏馬國柱妻原氏王立旺妻朱氏李應科
妻郭氏喬起鳳妻張氏衛登科妻畢氏劉昌達妻呂
氏衛泰妻王氏生員趙亨妻衛氏生員衛賁妻田氏
田成妻李氏舉人劉植妻趙氏生員石瑄妻張氏妾
涂氏鳴贊郭璋妻王氏以上俱守志節

陵川縣

明

韓時妻牛氏夫亡無子年二十三誓守一紡績養姑洪

武七年旌表

武繼姑父母早亡依兄簡議贅里人張旺為壻未婚會
簡有五臺役以旺代旺病歿役所同行函骨歸繼姑
哭之痛叔母李曰何慟為再擇所從耳繼姑云婦人
守一安得此語是夕投繯死正統間旌表

和憲妻蘓氏生子甫週憲歿氏年二十二甘貧守節終始不渝成化間旌表

趙源妻王氏張真妻李氏舉人王潔妻和氏俱守志節成化間旌表

進士武思明妻姬氏思明早卒氏年二十五清閨自閔誓不易心正德間旌表叅政王尚綱以雪竹命題咏其事

生員武來遠妻韓氏遠死遺腹生子世喜氏年二十翁

姑在堂家貧食力生事死葬動合儀禮州守馬泗驥
上其事

生員張智妻杜氏夫亡無子嘗云婦人一醮不移安忍
以人倫為狗彘行年八十二卒壻徐模以禮合葬

李喈妻王氏夫亡遺腹生子躬勤紡績以育孤兒年八
十卒

生員都一龍妻婁氏少許配龍龍病篤迎歸甫一月龍
卒氏年十六念舅姑失所忍死孝養冰貞不數年踰

八十萬歷間旌表

郎娥兒貧女也議配侯存兒少養其家會有惡少窺之乘翁姑偶出遂逼娥娥峻拒之不逾刻報繯死惡少旋論如法萬歷間旌表

生員王克耜妻甯氏夫卒撫孤學禮為邑庠名士復天死孤孀年八十而歿

生員婁子遇妻郎氏年二十喪夫遺孤繼世方七月艱苦育之成立甫授室而亡遺媳徐氏孝姑守節院道

有雙節之獎

生員徐炯妻趙氏年十六炯卒無子貧苦不能舉葬資力母家年逾六十茹荼自甘傭針指過悴遂傷一目事聞旌表

生員婁子進妻徐氏年二十二孀居無子六十餘年人無間言院道扁獎

舉人韓國賓妻李氏夫亡年二十四矢志撫孤垂四十年崇禎間旌表

宋希堯妻徐氏夫亡年十八遺腹生子廷彥督教食餼
得貢巡按郭題旌

宋希文妻李氏年二十而寡投繯數四救甦清操無數
教子廷瓚為諸生崇禎間旌表

省祭王學孟妻段氏事姑孝嘗以舌舐姑瘡流賊猝至
姑病卧與兒媳牛氏侍姑不捨罵賊被害

通判張信妻馬氏生員馬思駟妻郭氏馬一鳴妻武氏
武松清妻王氏郭應堂妻蘓氏趙守庫妻馬氏韓朝

士妻李氏徐党妻賈氏王餘慶妻和氏徐必昌妻趙氏武鎮宇妻都氏武新民妻馮氏某妻都氏甯承法妻張氏以上俱守志節

國朝

生員都養德妻李氏年二十孀居撫子迄於成立順治間旌表

臨川令李向禹妻王氏姜瓌亂猝逼城下氏曰君往矣守土無以家為向禹率內騎出捍氏以白練縊於中

堂有二婢從之

關中順妻王氏年十六夫亡翁姑念其少欲嫁之抵死不從守節畢世

焦崇保妻郭氏鬻飯為生崇保歿守節不渝
武存智妻郭氏無子女守節不二人無間言

生員王亮采妻婁氏亮采出繼叔嗣姜瓌變所生父母失養行志則屈抑於勢隱忍則負疚於心賴氏委曲調停隱行其孝邑令給匾旌獎

靳天挺妻牛氏年十八而寡子在襁褓有諷別適者氏剪髮髻面明其不二曰兄為孝子吾不能為節婦乎終不奪孝子者甲子舉人牛照牛魁斗也

貢生王四門妻都氏家貧女紅佐養有孝名比姑歿舅耄孝謹愈摯謂四門曰汝婦賢能為我撫少子無何四門亦歿氏當室四十年舉遺命哀切督課幼叔四岳遊庠邑令扁旌

姚之銛妻郭氏幼孩許字後之銛貧且病父母有悔意

氏決計求死恐滋他議遂歸姚之銛尋歿氏年二十
六苦志撫孤至死不怨督學汪灝表其閭

生員張起鵬妻李氏武程鵬妻楊氏宋景星妻李氏趙
時通妻王氏都如典妻武氏太學徐之琦妻馬氏太
學馮學謙妻高氏王文隧妻曹氏貢生婁銘妻秦氏
生員婁繼爵妻牛氏牛自通妻秦氏都基泰妻李氏
生員曹亮妻王氏生員和暢妻徐氏王文炳繼妻朱
氏千總武柱國妻王氏生員武立幼妻王氏生員王

者儻妻蘓氏生員王牧民妻趙氏盧騰雨妻陳氏以
上俱守志節

沁水縣

明

楊文慎妻車氏文直妻侯氏文慎兄弟相繼死車與侯
俱年二十餘車無出侯有一子世隆僅週歲二人誓
不他適撫養幼子世隆成立咸以母事之非親串不
知為誰子洪武間旌曰雙節

原大做妻郭氏大做早卒氏年二十二無子守節後大
做弟大經夫婦俱亡遺一子一女俱幼郭撫如已出
卒皆成立

庠生張謙光妻竇氏光卒氏年二十四子宮在襁褓守
節撫之備極艱辛卒能有成孫五典登第氏猶及見
焉

庠生李新香妻竇氏新香病篤氏籲天以身代卒不起
氏慟幾絕撫一子二女事孀姑及翁所遺二妾俱盡

禮父玳賈於梁不返氏養其母終身奉詔旌表外孫
張忠烈銓立傳

張安祝妻焦氏甫于歸安祝以貧故往來梁宋間鬻鹽
三年始歸月餘復出及氏生子而安祝已死有議改
醮者氏輒引刀自刎傭作餬口艱苦備嘗卒能養姑
代終撫子成立

廩生王體乾妻張氏夫亡子維城九歲氏歷艱禦侮謹
護育之朝夕勉以詩書嘗為之火荆照讀城列明經

孫曾相繼成名

廩生劉用章繼妻張氏用章前娶李卒遺孤韓僅三月
張年十六奉堂上以孝聞越二年夫亡守節誓死及
殯臨穴見止容二柩隨觸首墓中救之甦曰是欲我
代夫事親守孤存劉耳自是孝敬益至撫韓如己出
韓乙榜恩貢兩孫入泮皆親見成立焉

庠生韓可式妻張氏夫卒子睦甫八月氏矢柏舟歷艱
辛四十年奉姑以大耄終撫子成立及見其孫縣令

旌之

韓可仕妻王氏結褵僅七月可仕適湖廣不返氏艱苦無
依日佐人針指以養姑實氏曲盡婦道終身無怨

省祭趙光輝妻實氏夫卒氏志守節孝事二親嚴率兩
子家珍家璉天啟間旌表

廩生趙家珍妻白氏珍早死氏守節撫遺孤永寧為諸
生

趙家璉繼妻商氏璉早死前妻生子永健氏撫健不啻

已出健長食餽亦稱克孝

趙永寧妻霍氏永寧死誓守與祖姑竇氏等稱一門五

節

廩生趙永健妻呂氏永健早死氏產遺腹子品與姑商氏相依為命機聲軋軋備歷酸苦後品成立於商稱孝孫於氏稱孝子商壽八十二氏壽八十九蓋賢慈節孝萃一門云

儒士韓施仁妻劉氏夫亡氏欲從死姑勸之撫孤孤復

亡氏三就縊家人覺而救之嗣姪瑄為子事姑孝撫
嗣慈學使旌其閭

席曰正妻王氏年十八正亡祖姑九十二翁姑七十餘
氏生事葬祭俱盡禮家鮮親丁止有十齡從姪崇敬
撫為已子後敬娶妻生子珍夫婦以貧轉溝壑死氏
含辛撫珍卒至成立

實顯福妻韓氏年十九夫故遺腹生子韓初奉姑育子
閱四十年姑卒又四年韓初亦卒孤苦異常節孝兼

盡當道表之

舉人張鈴妻劉氏莊靖公東星女孫鈴早卒劉矢節撫
孤道溥未幾道溥殤劉絕飲食誓必死舅姑令嗣猶子
道濟數年道濟亦亡凶慘疊罹四十年貞操無數得
旨建坊旌表

季子實妻竇氏事姑盡婦道正德初流寇犯端氏居人
逃避子實偶外出氏負姑涉沁水匿南山岩穴間賊
至大索氏被執賊首見其艷欲犯之大罵不從賊刺

之暴屍市上已而甦顧其姑不知所在見賊復罵不絕口賊投大石碎其首見者無不哀悼焉

李沾妻劉氏沾卒劉自縊家人救之時方娠其姑以存後為勸及生三日天劉遂不食死時年二十餘事聞旌表

郭志妻劉氏志溺死求屍不得氏朝夕不食比得屍遂投繯畢命

劉時動妻李氏陽城李榮先女幼字時動後時動父歿

家索榮先意中變氏知之甫十歲即誓死嚙臂投崖
賴草藉得不死及笄歸時動未幾時動病卒氏自縊
以殉時年十九

李鴻桂妻崔氏夫死三日禮殮畢即自縊死年二十歲
王赴瀛妻陳氏夫故氏年十八即日自縊崇禎二年奉
詔建坊旌表徐令為作贊

趙完璧妻李氏遭賊亂自縊夫前免辱

吉尚本妻王氏尚本死晝夜號泣不絕七日不食死

郝時雍妻李氏雍旅病故氏聞訃即自縊建坊旌表

徐承祖妻李氏承祖故氏年未二十號泣不食三晝夜

即縊以殉

庠生霍欽翼妻常氏遇寇驅脅罵賊不辱投井死

王壯祚妻霍氏寇至逼凌抱子投河死督學張扁旌曰

抱嬰伸義

席崇儉妻張氏崇儉病侍湯藥浹旬不寐崇儉卒氏自縊與

夫並柩奉詔旌表

貢生李日芳妻張氏性溫嚴事姑孝崇禎六年八月流寇陷沁城氏攜幼子姚登樓避難賊舉火焚樓衆啟門出氏跪祝曰李氏止一子賴天庇佑不罹寇慘氏縱死何憾將幼子先擲去自墜樓死

庠生衛思洛妻尚氏流寇陷城思洛遇害氏與兒婦李氏絮子女投火死

庠生李珮妻陳氏崇禎八年被賊脇不從偕幼子文龍俱遇害

張道瀟妻馬氏于歸時瀟已抱病越數月而歿氏誓以身殉悲憤成疾卒年十六給諫楊時化稱曰貞孝女為文表墓

張效瀟妻衛氏流寇至瀟被害氏跳城死

常烈女常治躬女王加印作亂逃避山谷賊見逼誓不受辱自縊督學張扁旌

霍夫人張忠烈公銓妻也銓家實莊為沁水巨鎮先是銓父兵部尚書五典以流寇縱橫築牆為堡甚堅後

賊犯寶莊時五典業前歿銓子道濬道澤又官京師
寇將至衆議棄堡以去夫人曰避賊而出家將不保
出而遇賊身將不保等死耳死於野吾寧死於家且
我據堡以逸待勞誠守禦有方賊雖衆其如我何乃
躬率僮僕誓堅守寇至環攻勢甚急而堡中守禦具
胥備矢石並發寇負傷滋衆越四日訖不克逞而退
其違夫人言出避山谷間者率遇寇淫殺尤慘惟張
氏宗族得全冀南兵備道王肇生表其堡曰夫人城

韓秉仁妻郭氏家貧仰食女工奉孀姑竟成廢疾不能
仰視姑與母一時同病氏更迭省視不以貧疾憚煩
既而姑病篤氏專奉姑跪伏頻更牀褥不令穢溺及
體未幾母卒氏奔哭盡禮即返以姑病易衣而入姑
竟不知其失母越旬日姑亦卒殮殯合禮邑人皆稱
其孝

譚福妻李氏韓永實妻李氏楊世錦妻張氏張鑑妻王
氏官生李希夔妻張氏庠生劉喬蘭妻柳氏庠生丁

世珍妻王氏霍鍾妻張氏劉用力妻常氏王久棘妻
劉氏竇加猶妻霍氏庠生衛思濟妻張氏霍汝廉妻
田氏王誥妻竇氏王卿妻張氏劉東吳妻常氏衛宇
樸妻李氏庠生何通海妻李氏韓任仁妻劉氏王蘊
古妻郭氏王體民妻黃氏張綸妻尚氏李春盛妻張
氏鄭紹周妻楊氏李本培妻張氏秦增榮妻趙氏以
上俱守志節

國朝

趙光重妻張氏光重早失怙恃與兄光燦素敦友愛氏與光燦妻李氏妯娌同居和好無間縣令旌曰敦和起化姜寇破寨投井死

趙福溥妻牛氏姜寇陷邑砦氏被執不屈投井死

庠生孫之振妻楊氏陽城人會稽令楊鵬翼女之振歿氏年二十矢志不二撫孤讀書入泮艱苦歷四十年實仲方妻劉氏年十八仲方歿氏即絕食五日扃戶紉衣縊死其先祖姑韓氏年二十而寡撫子起光姑呂

氏年十九而寡撫子仲方蓋一門三節而氏尤烈當
事屢旌之

竇瑄妻霍氏年十七夫亡無子事孀姑盡孝道守節三
十一年先姑歿縣令旌其門

盧氏趙氏汾州府教授竇瑀副室也瑀卒俱年二十有
奇盧一女趙一子二氏泣誓曰命之不淑蚤失所天
如綫之脉惟吾兩人是賴設有二心豕犬不食吾餘
矣自是砥志保孤歷三十餘載趙五十有四盧六十

有四卒大學士田從典為作表太史韓覲祖為立雙節傳

恩生張道濟妻李氏年二十二夫亡無子撫幼姪為嗣保抱扶持卒底于成守節五十年六

張體德妻趙氏年二十二夫亡守志撫子瑛娶婦生子瑛夫婦胥歿復撫雛孫二十餘年得見曾孫而歿

舉人趙鏊繼妻王氏年二十二夫卒嗣子育溥舉鄉科官常熟令卒繼媳陳氏年二十八嗣子殤更嗣孫姑

婦共矢冰操王年七十有七陳年六十有六卒

趙喜妻李氏年二十一喜病氏誓從死及病革氏即引繩自經府縣咸旌其墓

李國維妻梁氏韓琬妻牛氏韓調妻侯氏韓珂妻王氏
韓萬應妻趙氏王命台妻康氏孫遐妻李氏通判王
政新側室蘭氏楊鶴洲妻王氏貢生李日亨繼室翟
氏劉用俊妻張氏李如龍妻吳氏謝承璋妻竇氏郭
挺基妻馬氏蘓眉妻韓氏韓治本妻張氏韓寀妻王

氏王世俊妻常氏馬文瑞妻韓氏張瑜妻劉氏商文
彥繼妻王氏商瑞雲側室王氏竇佑妻霍氏劉元宗
妻維氏官生王誕妻馬氏子敬五妻韓氏楊公美妻
李氏王諒妻韓氏李維世妻竇氏生員李慕嚴妻賈
氏張道涓妻柳氏張德梁妻韓氏張志貞妻郭氏王
榼嵐妻楊氏王杲妻韓氏孫萬齡妻張氏商翠雲妻
劉氏譚廷擢妻馮氏生員張茂公妻張氏高靖妻趙
氏以俱守志節

蒲州府

永濟縣

北魏

姚氏女字勝河東人少喪父無兄弟年六七歲即有孝性言其父者聞輒垂泣正光中母死勝年十五哭泣不絕聲水漿不入口者數日不勝哀遂死太守崔遊申請為營墓立碑自為制文表其門閭比之曹娥改其里曰上虞里

隋

裴倫妻柳氏河東人少有風訓大業末倫為涇源令為賊薛舉所陷倫遇害氏時年四十有二女及兒婦三人皆有美色柳氏謂曰我輩遭逢禍亂汝父已死我自念不能全汝義不受辱于羣賊將與汝等同死如何女等垂泣曰惟母所命柳氏遂自投于井其女及婦相繼而下皆死井中

唐

樊會仁母敬氏蒲州河東人字象子筭而生會仁夫死
事舅姑祥順家以其少欲嫁之潛約婚于里人至期
陽為母病使歸視敬至知見給乃外為不知者私謂
會仁曰吾孀處不死者以母老兒幼今舅將奪吾志
汝云何會仁泣敬曰兒母啼乃伺隙遁去家追及半
道以死自守乃罷會仁未冠卒時敬母又終既葬謂
所親曰母死子亡何生為不食數日死聞者憐之

張氏御史中丞張巡姊嫁陸氏從巡睢陽虢王巨自彭

城走臨睢張氏遮王勸勿行不納賜百緡弗受為巡
補縫行間軍中號陸家姑睢陽破先巡被害

宋

蒲芝河東張愈妻也賢而有文愈卒芝為誄曰高視往
古哲士實殷施及秦漢餘烈氤氳挺生英傑卓爾逸
羣孰謂今世亦有其人其人伊何白雲隱君嘗曰丈
夫趨世不偶仕非其志祿不可苟營營末途非吾所
守吾生有涯少寔多艱窮亦自固困亦不顛不貴人

爵知命樂天脫簪散髮眠雲聽泉有峰千仞有溪數
曲廣成遺趾吳興高躅疏石通逕依林架屋麋鹿同
羣書遊夜息嶺月破雲秋霖洒竹清意何窮真心自
得放言遺慮何榮何辱孟春感疾閉戶不出豈期遂
往英標永隔抒詞哽咽揮涕汎瀾人誰無死惜乎材
賢已矣吾人嗚呼哀哉

明

段小五妻李氏年二十夫亡母哀其無子諭改圖氏泣

曰是吾命也吾既為段氏婦知死段氏而已舍此何
之母止不復強氏晝耘夜績百折不變洪武間旌表
薛綱妻楊氏年十八歸綱越四載生子小來綱當遣戍
臨行顧氏曰吾親老子幼惟子是賴氏謹識之後綱
死于軍未幾小來補父役亦死于軍二親相繼歿氏
易居營葬事貧難自給或勸之更志氏峻拒之就食
于弟絕葷垢面終始不渝天順五年旌表

薛宣妻荆氏年十九歸宣生子小臺方六歲宣病篤囑

氏曰吾父以科臣使占城卒海外今吾病不起老母
幼子爾善視之言訖而終氏斷髮矢志奉姑撫幼盡
其孝慈天順間知州上其事建坊旌表

解輝妻董氏年二十二輝亡遺子福寧未歲父母以子
幼家貧諷之氏泣曰夫死易節貧富二心非人也況
二老在堂弱子在抱奚忍棄之終身蓬首垢面力績
以奉舅姑舅姑歿與子親負土穿壙以葬哭泣盡哀
天順五年旌表

牛貞女牛仲明女劉愷未婚妻愷容外先娶衛衛卒遺
一子愷父母為聘女預迎以歸無何愷死中途櫬及
遺孤抵里女撫孤如已出事翁姑至孝服禫父母勸
之嫁曰汝未配非改節也女曰身既歸劉即劉婦矣
親老子幼尚奚適耶父兄陰納施氏聘女泣愷神主
前五日不食死孫成立名釗釗子名忠甫忠甫子名
東旭三世皆廬墓時稱為三烈孝

陵川縣君輔國將軍朱聰琮女適裴禹卿嫁甫歲地震

城崩禹御死焉縣君以首觸樁嘔血死年二十有一
詔旌為貞節縣君按府志作越五日自縊死

韓玻妻薛氏玻商于淮病歿氏聞訃慟不欲生弟瓚妻
王氏慰曰嫂得無念後嗣乎我生男即為伯後氏泣
謝早夜祝生男已果舉子楫未彌月即抱撫楫官通
政贈氏太孺人孫大學士曠貴累贈一品夫人

段輔妻王氏輔卒矢節事孀姑王氏以孝謹聞當事旌
其門曰姑婦貞潔楊襄毅表其墓曰節義成雙

楊鴈妻王氏年二十夫歿遺子甫三月事病姑撫幼子
勞勩備至子偶墮井中經日出之無恙人謂苦節所
感楊襄毅志其事

王進妻張氏年二十九夫亡甘貧撫孤孀居七十年壽
九十九卒奉詔旌表

張楨妻馮氏夫亡事孀姑盡孝撫子成立萬厯間詔旌
張寧妻雷氏少寡子誼幼苦節數十年壽七十有二卒
誼繼妻解氏賢淑有德解素饒奩具甚厚姑嫁仲女

鮮裝送姑慙且愴氏聞即出已貲遣之後亦以節顯
孫四維貴二氏俱贈一品夫人建有雙節貽慶坊

孟端妻邵氏早寡姑母欲奪其志氏抱幼女亥隕于井
八歲女熙墜徙之既出屍母猶抱亥熙抱母閭巷悲
感後十年知州屈拱北始以事聞詔建祠樹坊遷墓
同鄉王謙為之傳都御史曹于汴撰祠碑記

中書舍人楊元禧妻張氏性仁孝年十三適元禧及笄
元禧歿孀居裴氏難其少勸改適氏矢死不從姑愛

敬彌至知州勇慎上聞詔旌表雙節

生員楊元祗妻王氏夫故誓不欲生滴水不入口繼以
號泣七日而死

王三宅妻史氏年十九夫亡孀居六十五年子公弼成
進士以母節聞建坊旌表

郭浚妻馮氏聰慧賢雅年十四適浚甫一載浚卒氏臨
牀哀慟觸地求死姑撫諭曰汝幸有娠得男以存祀
猶愈於死氏頷之逮夫葬越八日生一女氏泣曰而

今復何待也即絕粒旬日死事聞詔旌

生員田民皞妻雷氏崇禎壬午冬悍將任國奇兵過蒲所至劫掠氏被擄投井死

舉人盧世臣妻田氏聞任兵過蒲知必不免與母雷氏結衣投井死

生員喬振翰妻楊氏喬及芳妻張氏聞賊陷城同赴井死

義民王應寵妻楊氏妾薛氏闖賊至蒲寵設靈具自題

其主曰皇明小民王應寵之靈率妻妾痛飲共投繯
死偽官義之親為殞殮

知府韓于宣妻薛氏闖逆陷城執任宦索餉于宣自縊
氏數日不食聞賊軍擊門亦自縊

忠烈韓承宣妻王氏承宣死國氏即欲死夫難時戎馬
充斥諸子散失念姑老無依忍死侍左右頻歷險阻
卒保無虞鄉黨咸稱節孝云

生員楊五禮妻孫氏夫亡事翁撫孤克盡其道甲申闖

變翁被害氏藏身厠中污體垢面賊怒揮刃破額而去氏負創殮翁哀泣如禮後全節以壽終

薛永淳妻王氏少寡闖賊陷蒲被執不屈投井死

裴渤妻張氏夫亡遺一女矢守養姑姑甚德之會母欲奪其志氏抱姑暨女一慟而絕

叅將張亭鯉妻王氏癸未闖逼城夢鯉死難氏持刀自刎僕婦力救免

國朝順治初復值虞寇亂入山逃避賊追及捐軀投山

下賊退昇至舍三日復甦後十年卒

副千戶韓印勲妻孟氏年二十印勲從征流寇辛苦節
數十載比歿風雨陡發有光燭體閃爍如電里人異
之

守禦所應襲千戶史陞妻馮氏生員韓烜妻段氏杜文
俊妻羅氏並孀居守節奉詔旌表

史璘妻宋氏洪杲妻張氏嚴圭妻王氏杜昂妻史氏張
璠妻劉氏王寅妻嚴氏生員李應奎妻劉氏張文俊

妻屠氏姬懋妻楊氏孟子厚妻牛氏郭敦妻喬氏舉
人王麟妻牛氏生員史夢陽妻王氏蕭鎡妻張氏王
彬妻馬氏楊霆妻屈氏生員羅拱極妻賈氏舉人張
永寧妻翟氏趙釗妻尹氏舉人馮舜田妻翟氏甯師
賢妻高氏武生韓塏妻張氏杜惟修妻王氏郝璠妻
衛氏趙棟妻陳氏苟儀妻王氏盧滋妻鄭氏進士馮
舜漁妻李氏魏時盛妻韓氏葛之錦妻侯氏以上俱

守志節

國朝

李永春妻陳氏年十八歸李越四載夫亡遺子甫三歲
家貧女紅自給時里中病疫母子胥染勢甚狼狽陳
仰天禱曰黃口孤兒宗祧所係寧斃我毋傷子尋皆
無恙訓子凜若嚴師子卒成立康熙四十一年疏請
旌表

胡銓妻侯氏少寡守志久而益勵雍正八年旌表

張奇與繼妻姬氏年二十六奇與客死訃聞氏哀毀逾

情拮据迎喪歸葬撫前子恩情備至稍長脫簪珥以資服賈家小康淡薄如故康熙五十年疏請旌表

姚元度妻左氏年二十元度病革顧謂氏曰我死汝無守顧俟吾母終年後子幼善撫其成使嗣我氏聞哽咽不能語洎夫卒截髮毀容盡瘁事育孀居三十七載雍正五年疏請旌表

尚苗姐尚正基女族叔所基素無行覲女姿久蓄異志一日見女祖茂明薙穀田間叩正基亦摘花出所基

遂潛往女方櫛沐從後樓之女驚急奔出所基禦不
許女趨坑上將逾牕下所基強持裂其衣女詈罵不
屈所基恐刃殺之先是所基之來東鄰尚崇基曾遇
于女門至是疑焉因踪跡得之雍正七年疏請旌表
王承貴妻劉氏年十六適王翁蚤鰥氏勸夫請翁再娶
脫簪珥以資費越十載夫亡事翁姑如謹翁姑歿遺
夫弟承信方幼恩撫如已子守節三十二年雍正八
年疏請旌表

左永篤妻秦氏年十八夫亡守節六十餘年疏請旌表
訓導張述善妻李氏姜寇變李隨姑王避亂山峪兵迫
奮身投崖死又王浩元妻李氏亦以不屈墜崖死

葛振盛妾趙氏姜寇變氏與夫並被擄乃密以簪珥投
夫且曰兵營中勿認我為婦懼汝害也兵欲亂之不
從抽刃以脅氏乃引頸迎刃而死

生員張瑕妻韓氏避盜入山賊追及之韓顧謂家人曰
爾各自為計無顧我此即我畢命時也遂投崖下婢

滿兒以手挽之因俱碎焉

展奇第妻王氏姜賊變被執上馬力墜者再終不屈賊怒殺之

任英妻王氏早寡家貧無依孀姑勸之嫁氏曰婦之不
死以有孤在耳不然身且殉矣何言嫁耶其後家益
窮姑攜幼女他適氏招孀母同居冰蘖四十餘年

甯學古妻張氏少寡事孀姑高氏惟謹未幾媳楊氏亦
孀一門三節胥以冰蘖終

吳來亨妻朱氏來亨任蒲州學正陞臨潁令未之官而卒遂家于蒲貧無親舊氏青年守志撫孤震霞俱以文名歷六十餘年壽八十終

展範妻丁氏博士羅焜妻郭氏張崇茂妻呂氏王良嘉妻李氏貢士孟紘祚妻張氏陳邦柱妻張氏魯漢基母李氏師家讀妻楊氏張問世妻柴氏葛正奇妻任氏甯化熊妻劉氏陳朝瑜妻劉氏韓甸宣妻朱氏薛麟徵妻楊氏高擢桂妻張氏姚奇勳妻陳氏張紹賢

妻柳氏任宗顏妻牛氏楊繼星妻張氏尚永綱妻魯氏張奇瑄妻解氏姚攀龍妻李氏沈傳高妻王氏蒲州守禦所王錫誥妻張氏守禦所王洪恩妻李氏張大佑妻賈氏王士嵗妻吳氏盧應昌妻胡氏任養善妻張氏張紘妻朱氏牛天才妻常氏牛扶朝妻張氏胡世茂妻柴氏姚養定妻封氏楊密繼妻趙氏馮俊偉妻姚氏任元卿妻常氏焦帝正妻張氏焦君正妻胡氏尚希滿妻蔡氏楊積功妻尚氏馮四謙妻高氏

張必應妻辛氏朱錦妻高氏李讚適妻楊氏趙嗣宗
妻薛氏同知韓世麟繼妻馮氏趙正立妻王氏孝廉
韓鏡妻董氏秦之貞繼妻劉氏楊繼旺妻張氏李浩
妻曹氏孫一驥妻張氏張三俊妻孫氏張宗渠妻趙
氏張三晉妻相氏張煜妻秦氏焦思禹妻蘇氏妾李
氏以上俱守志節

臨晉縣

北魏

金州刺史郭牙妻崔氏牙調官當赴留氏事母母病劇
牙歿于官氏忍容事之不令有聞母尋卒牙匿亦至
氏盡禮營葬畢不食而死鄉人表曰孝節之門

明

董良德妻宋氏年十四適良德家貧不繼朝夕閱十年
良德卒鄰里憐其無依咸為勸嫁氏不從遂自縊隆
慶間旌表其門

生員王慕妻陳氏年十九夫亡遺子三策未期家貧如

洗人皆難之氏誓死不貳織紵力作撫三策成人踰
四十年卒巡按扁旌其門

生員王師德妻姚氏夫亡無子撫姪炫以繼夫祀訓讀
列膠庠年七十卒

王康妻荆氏年十七夫亡子于楚在襁褓茹荼撫孤萬
歷間奉詔旌表

許遷喬妻張氏歸許二載生子爾甲未週夫亡織紡度
日終身不二有司上其事奉詔旌表

張鳳翔妻呂氏年十七夫亡遺子樸方在抱孀居四十年訓子成名奉詔旌表

張宜妻蔡氏年十七夫亡無子誓不改適艱苦勵操壽七十而卒有司上其事詔旌

廩生姚在陞妻胡氏子翼宸妻李氏甲申逆閭將及胡顧謂李曰賊熾甚倘不免實墜家聲毋寧死之遂以襁褓子囑乳婦趨赴深井姑先下媳繼之至今名其井曰雙烈井

王氏少司馬李棲鳳子世昭妻閻賊入境氏偕民婦避
難峨眉原之土穴中賊搜獲羣驅而出氏據地不起
賊呵之且脅以刃氏曰頭可斷義不可辱賊曳之行
十餘步見深崖歎曰吾得死所矣躍身投下腦裂骨
折而死

荆世寵妻陳氏劉思光妻王氏高標妻張氏少司馬李
棲鳳繼母胡氏胡勳妻周氏以上俱守志節

國朝

生員荆爾挺妻孟氏夫亡矢節事姑盡孝訓子長發讀書入泮時稱節孝俱全康熙二十七年建坊旌表

無事呂雲藻妻楊氏夫亡撫前室子增有成歷數十年清操允著題請建坊旌表

張汝民妻杜氏年登百歲康熙五十一年旌表

孫烈女生員孫永徽女字孟某于歸前五日孟卒女日夕飲泣誓不更適尋邁危疾語祖母曰兒夜遊澗遇一柳二椿間憩焉閱月而卒孟葬請祔許之墳正當

一柳二椿間也廣文石琨園作烈女傳

王宗陵妻衛氏合卺夕宗陵已病篤未三月宗陵卒姑憐其少欲為改字氏斷髮示志孀居十四年而卒

劉四維妻樊氏年二十而寡撫子撫孫更撫曾孫植三世菀孤苦節七十八載壽九十有八卒

生員劉復元妻杜氏年二十三夫亡無子女貧且不謀朝夕姻黨勸之他適氏矢死不從茹苦四十年卒

周文奇妻郭氏早寡誓不改操妾孫氏感其義同守以

終邑令旌其門曰一門雙節

衛大垣妻馬氏年十七夫亡誓死方抱娠勺飲不入口者數日舅姑諭之曰汝不為而夫後嗣計耶氏意寢解閱數月生子弘生辛勤鞠育已歲十有二偶過外氏突有諷之嫁者氏泣數行下曰向之不死徒以藐孤已長吾生為贅疣耳遂攜孤返備言身後事潛自縊時年二十有八

荆璋璘妻姚氏劉從寬妻姚氏舉人姚在朝側室焦氏

衛應光妻姚氏張良魁妻王氏王士熊妻許氏張經
典妻劉氏李烜妻張氏荆澍妻趙氏樊錫爵妻趙氏
王聘鰲繼妻韓氏孫鴻烈妻衛氏杜尚德妻張氏許
樸妻趙氏王愜妻張氏閔國法妻張氏荆山英妻王
氏謝紹燕妻薛氏謝顯相妻王氏郭柏知妻呂氏衛
季妻郭氏趙京妻段氏魏祚妻王氏王萬成妻李氏
荆騰鶴繼妻趙氏孫應瑞妻郇氏姚五英妻樊氏程
秉讓妻衛氏李岑妻王氏呂俊聲妻周氏王蕙芳妻

王氏楊松林妻王氏王錫瑀妻陳氏晁貴妻孫氏舉
人賈顯妻郭氏吳重明妻衛氏周道昌妻秦氏賈昉
繼妻陳氏吉逢泰妻趙氏以上俱守志節

虞鄉縣

虞

宵明燭光舜女也路史舜次妃癸比女生二女曰宵明
曰燭光處河大澤靈照百里是為湘之神羅苹注大
澤謂洞庭言神處此故靈光及于百里也以湘神黃

陵為堯之二女非舜之女也唐屬岳司馬氏屬長沙
天祐中號懿節

元

麻懷祖妻顏氏年十七夫亡撫男紹先守節壽八十有
八卒至大四年詔旌其門

明

邵明紀妻張氏年二十夫亡矢殉會葬夫作壙氏囑曰
壙宜寬為我終身地壙成氏閉戶沐浴理妝整容如

歸寧狀旋入室投繯死次日二柩同舉觀者流涕邵
嗣堯挽以詩

邵千妻高氏年二十夫亡無子人利其產逼他適氏刺
面截髮誓死拒之時千兄萬夫婦胥歿于疫遺子孟
通甫三歲氏撫如己子卒底成人氏卒孟通為終三
年喪

國朝

生員曹銘妻王氏年十八適曹越七年夫早世撫四歲

子讀書成名卒年六十有二生員曹昌辰妻李氏年二十三昌辰故遺孤甫十月撫成列庠序又先卒氏荼茹撫孫壽八十一而終雍正五年二氏俱祀節孝祠

李月林妻姚氏年二十二夫故無子事孀姑三十餘載姑年七十卒氏亦旋歿

薛建基妻張氏年十八歸薛二十二而寡子鍾秀甫彌月守節七十一年九十有二卒

姚家寧繼妻邵氏年二十五夫故無出前子亦早折育
孫守志終始如一

王弘義繼妻張氏年十九夫故家貧無子女撫前子振
魁成立矢節終身

生員申燮妻張氏年十九夫故翁繼歿遺孤目雙瞽氏
誓死不二歲侵隣有婦孀將轉適氏慰留之賑以粟
米縣令旌其門以為世風

王貞女王業建女名柏英字羅村魏述基將嫁前一夕

述基死女哀慟絕飲食者三日請往弔父許之至則持服奉姑撫族子為嗣邑令劉旌曰金石矢貞

張我僕妻王氏生員曹元勳妻姚氏申士珍妻王氏邵明超妻王氏晁貴妻孫氏張亮之妻左氏麻世喬妻翟氏樊世誠妻靳氏樊名揚妻王氏樊弘祚妻尚氏進士尚翌岐妻鞏氏楊櫛妻韓氏張蘊樸妻劉氏張自重妻尉氏以上俱守志節

猗氏縣

元

薛圭妻王氏年二十適圭生子璧甫週圭卒養姑育子
守節弗渝璧娶杜氏從戍卒杜年二十六父母勸更
適杜曰妾姑守節妾忍棄姑失節耶卒不能奪璧從
弟珍娶趙氏年二十珍亡無子亦守志不他孝姑彌
謹至元間旌表為三節之門

楊恩妻趙氏生子彥貞方九月恩亡攻苦撫孤皇慶中
旌表彥貞娶杜氏生子思諭方五歲彥貞亡杜年二

十四守志如姑至元四年旌為雙節之門

明

廩生王臣妻何氏年二十四生子宗甫一歲臣亡氏孝
養姑嫜課宗業儒成進士官工部郎中姪宏亦早孤
氏教養如宗遠近賢之事聞詔旌

翟通妻解氏年二十七通卒矢守訓孤嚴肅長宣務農
業次敬治儒術孀居二十餘年壽八十卒敬成進士
官太僕寺少卿贈太恭人

喬雲妻令狐氏年二十二夫亡食貧守志撫子成立壽
八十有四萬歷中巡按趙題旌

任宏妻張氏年二十三夫亡遺子闕甫週族人漁其貲
逼嫁不撓謀斃孤氏扃戶匿闕者數年暨闕露頭角
氏泣曰吾始為汝母汝始為吾子矣紡織佐讀闕早
貢于鄉官河間通判孫汝亮成進士猶及見之壽八
十一卒隆慶己巳建坊旌表

舉人楊聯芳妻令狐氏少有至性從父鏜授列女傳及

筭歸聯芳甫成名尋病瘵卒氏年二十七遺一女父
母勸之嫁氏泣曰令狐詩禮之族奚容有再醮婦但
少時父所授書謂何乃迫女於尺組下耶自是不抵
父舍鄰有購舍傍隙地者斥曰吾孀而棄夫之宅何
顏見夫地下絕葦茹素不御綺羅守節二十餘年卒
楊騰飛繼妻姚氏前子仁妻孫氏仁先卒後三年騰飛
亦卒孫年二十三姚年十九姚女未週孫子佳印甫
一歲姑婦矢志畢世不渝

李貞賢妻范氏年二十三賢卒遺孤學顏甫三歲氏抗志守節課子力學成名巡按題請旌表

庠生裴鷗妻荆氏鷗亡氏啣恤撫孤四十餘年凜如一日巡按題請建坊旌表

庠生常元楨妻張氏年十八夫亡砥節撫孤氏嚴色正氣凜不可犯元楨弟家有鬼祟患擲瓦飛礮即貴介大紳至弗懼也張至則寂然無聲直指聞其事詔旌之

米萬廩妻董氏姑幾百歲失明夫亦瞽不能周養氏勤紡績以給食冬寒負之暄日每先姑後夫夜無衾挽夫足環抱其姑解衣相覆而寢數年如一日鄉里推舉當道旌其門曰賢孝之婦

庠生孫昌期妻陳氏昌期為族人昌祚凌迫死氏年二十一無子女抗志復仇屢控當道訴夫寃卒蒙審理昌祚坐罪褫衣頂遂哭告夫墓曰夫寃稍伸妾可從死但舅姑且老誰為侍養嗣自勤績經操井臼生養

死葬盡禮無愆孀居五十八年壽七十九歲卒

卞和玉妻朱氏和玉與楊生忤楊生動詬其父母和玉忿刺之死隨自經時氏年十九歎曰夫死孝妾獨不能死節乎亦即自縊喬侍御挽以詩有父仇恥與天俱戴夫死羞稱人未亡之句

武舉令狐縉繼妻姚氏年十九而寡矢死守節撫二子成立孀居六十餘年詔旌其門

雷汝茂妻原氏夫亡食貧守志壽八十七歲卒萬歷四

十四年建坊旌表

行人王春楨妻荆氏年二十六夫亡守節課子含光早年登第亦任行人疏陳母節詔旌

孔學易妻郝氏年二十三夫卒茹苦守貞歷三十七載事聞詔旌其子伯江育義女云姐適張有春年十七闖亂守義不辱拖子匿井中賊以火薰之死蓋亦由郝之貞訓有素也知縣陳素抱為之傳

陸氏庠生陸振奇女安邑義民廉名揚妻甲申闖亂陸

偕母劉避難堡中賊至被執甘言誘從不可遂脅之
載馬上以行陸投地詈罵曰死即死矣決不以良家
婦從賊污也遂伏刀

令狐氏陝西廵撫喬應甲子拱秀妻也崇禎初應甲卒
拱秀偕妻被逮胥吏迫就道手推令狐拂其指氏憤
然作色曰吾指豈為賊吏所污耶遽引刀斷之人咸
為之咋舌

令狐綱妻陳氏沈廷吉繼妻丁氏耿節妻楊氏史文德

妻管氏生員衛道妻李氏荆一德妻扈氏杜江妻張氏何東直妻孔氏孫周妻王氏楊繼志繼妻張氏喬應徵妻閔氏李光普妻楊氏何洪烈妻張氏生員喬唐建妻陳氏生員衛珣妻荆氏舉人閔養醇妻王氏生員荆可楓妻張氏何起翔妻李氏何士俊妻王氏曹鳳翔妻李氏荆永芳妻楊氏李春賢妻何氏王承倫妻張氏劉德盛妻王氏原夫倫妻張氏趙天福妻曹氏張嘉猷妻王氏高守山妻張氏鄭繼芳妻關氏

張問仁妻荆氏楊邦正妻張氏以上俱守志節

國朝

景登選妻李氏少寡守節撫孤終身康熙十一年建坊旌表

郭琛妻荆氏生子不育琛病革氏慟語母曰兒無姑何依無孤何撫願及其未瞑先死以博一顧母止之不得遂吞毒藥腸斷指裂見者雨泣琛一尋卒康熙二十七年事聞建坊旌表

衛孟麟妻荆士年少守節教子繩康有成康熙二十八年建坊旌表

歲貢荆冲奎妻王氏年二十六夫亡無子撫姪為嗣積勞成疾雙目失明苦節三十餘年事聞建坊旌表

郭邦畿妻裴氏年二十夫故子女繼天皀皀茹苦歷四十餘載康熙二十七年疏請旌表

杜得福妻楊氏少且艾鄰人荆良柱艷之會得福往冀田良柱以假物為名入室逼汚氏怒罵力拒得福歸

語其故姑以為醜不欲聞秘之氏恚自縊雍正五年
疏請旌表

何宗文妻石氏翁老病失明委頓牀褥反側需人氏扶
掖周旋者七年無倦色鄉黨賢之

劉文煊妻郭氏年十八夫亡無子撫姪守志繼姑尋卒
遺子女未離襁褓氏胥撫成俾有家室

衛中夏繼妻王氏歸衛食貧操作夫歿嚴翼守志嘖笑
不苟姻黨莫敢犯或以禮饋遺亦不輕受常戒子曰

人須自立勿受人憐也後闔學議請旌節氏曰守節分也沽名何為命子芳謝止之芳成進士官副使以理學經濟著氏封太恭人時孫既齊亦成進士官翰林氏猶手親紡績不輟壽七十有七

張永壽妻李氏年十八守節壽八十有八終子文光家貧讀書不能卒業有勸之克里書者文光曰不肖事母唯色養耳寧餓死不敢辱身吏胥漁牟滋蠹也手植果園供菽水時以孝聞

于應登繼妻邵氏年二十三夫亡課二子學成胥列庠
序前子是揚卒撫孫秦徵徵卒撫曾孫永錫氏之有
造於于氏蓋四世云

庠生荆文邵妻陳氏年二十四夫亡無子色養孀姑清
操孚于閭里女適郭琛年十八仰毒殉夫殆得母氏
之芳型歟

荆文漢妻郭氏年二十四夫亡與姒陳並矢柏舟人稱
荆門雙節

荆世芳妻靳氏少寡主母命改適氏不從族姊亦為世芳姬有二子協力共撫年七十五歲卒

陳可濟妻任氏家貧日不再食怨尤不形歲歉夫死于饑氏營葬畢號泣于墓投井死

郭為翰妻荆氏年十七適為翰逾歲為翰隨世父任卒于越氏飲毒自盡家人覺而解之自是日或一食故啜冷水未半年尪瘠而卒

荆天福妻張氏年十七夫亡生子甫三月值歲饑翁欲

嫁之氏不從翁被荒異地遺七旬祖姑氏紡績資養
不致凍餒後數年翁歸見老母康寧幼孫成立大喜
已乃大慟曰吾負孝婦矣邑令旌之

荆起端妻王氏夫亡遺子女各一窮瘁萬狀夫弟將奪
而嫁之氏投井死

史書妻張氏書本籍秦中行醫猗邑書卒遺一女氏父
進才勸其改適氏正色曰從一而終義也進才潛受
人聘氏聞寄女於史之友自縊而死

衛周慶妻陳氏周慶早世氏撫子密孫廣心皆不永年
又撫曾孫介迄于成立歷六十餘年壽九十一卒
岐烈女字李軒子為妻李子與人戲悞中箭死女聞訃
潛取聘帛自縊學政邵嗣堯為之傳

庠生喬雲書妻陳氏年十八雲書卒柏舟矢志苦節終
身

王命召妻暢氏年二十六夫亡撫三孤如董氏亦早孀
暢嗣以幼子引董同居玉成其志人謂暢愛其身施

及其姒云

王智妻李氏智弟信妻史氏俱早孀既而其姑又歿遺幼子四人二氏協力撫成完節以終

柴天福義子全妻楊氏全歿福年老病癱不能轉側楊躬親哺掖者五年邑令旌其節孝

曹啟倫妻王氏年二十二而寡無子念翁姑無依誓不他適歲荒菽水不缺于供翁姑倚之如子三十年如一日

庠生喬振茂妻張氏年二十四而寡子士容甫三月晨夕悲泣引縋欲自懸家人嚴伺之終不櫛沐毀容自廢迄改歲哀痛而卒

廩生王濟正妻令狐氏年二十九而寡如介氏庠生周正妻年十八而寡胥守志行當道以雙節旌令狐長子含弘早歲領鄉薦公車北上卒于燕遺妻令狐氏年十九撫從孫錫銘為後孀居六十餘年為不愧兩

姑云

張嘉猷繼妻潘氏生員杜鑛妻原氏荆服采妻王氏生
員郭至道妻張氏張中鶴妻原氏衛啟士妻高氏生
員景毓慶妻荆氏武生喬應祐妻閔氏生員陳國祚
妻張氏張士登妻解氏進士王含真妻陳氏郭斗乾
妻趙氏生員喬應訪妻庶氏張節妻王氏畢文禮妻
令狐氏楊公喜妻趙氏趙遵宋妻路氏生員荆欽章
繼妻高氏生員路弘運妻侯氏高起鵬妻張氏張厚
學繼妻邱氏王國信妻張氏景君順妻孔氏王公辛

妻席氏荆陽春妻管氏張其勲妻米氏邵憲堯妻許
氏許壯行妻李氏王謙益妻荆氏張志瑾妻陳氏楊
廣妻荆氏喬鎮蔚妻陳氏郭天錫妻曹氏張維先妻
郭氏杜維祺妻張氏張泰運妻曹氏荆含璟妻王氏
管廉妻曹氏媳趙氏王維緒妻王氏張新雅妻樊氏
荆佐馮妻王氏張運福妻王氏秦生妻范氏張金仲
妻楊氏令狐永年繼妻劉氏令狐永田妻尚氏荆文
貞妻王氏衛阮誠妻杜氏衛阮溫妻楊氏李喜中妻

韓氏柳自隆妻楊氏王作朋妻張氏許惟慎妻馮氏
許爾福妻張氏許維雙妻張氏陸法贄妻董氏樊龍
牽妻王氏原慎妻張氏荆文運妻石氏郭四教妻王
氏令狐士誠妻衛氏王俊學妻孫氏沈滿斗妻張氏
趙自清繼妻閔氏暢恩秀妻王氏姚養生妻劉氏黃
益福妻張氏潘成緒妻衛氏遲福貴妻王氏原始昆
妻李氏關時明妻王氏吳光耀妻路氏曹弘毅妻王
氏孫培初妻鞏氏南克明妻楊氏羅麟定妻王氏陳

立法妻曹氏張洪鶴妻王氏張問達妻王氏張所性
妻岐氏韓臨妻張氏孫騰蛟妻岳氏王遵法妻牛氏
孟仕晉妻陳氏劉應翼妻楊氏何紹先妻曹氏王茂
績妻張氏張宗賢妻喬氏解河東妻趙氏孟延楚妻
樊氏張奇觀妻王氏王九一妻楊氏王國秀妻曹氏
岳國英妻楊氏張士祿妻薛氏鎮撫令狐燭妻荆氏
生員張誼妻介氏陳國謨妻王氏張思順妻荆氏張
照乾妻喬氏耿增立妻令狐氏陸春林妻董氏荆佐

彭妻關氏張璞輝繼妻雷氏張文華繼妻裴氏孟仕
秦妻姚氏劉文煊妻郭氏張仲侯妻陳氏喬萃秀妻
陳氏楊敏妻荆氏張廷實妻馬氏孫士元妻吳氏衛
元青妻曹氏孟四臣妻齊氏劉來遠妻陳氏陳舉業
妻王氏關掄妻任氏王暢修妻邱氏令狐居慎妻路
氏張士智妻姚氏陳美發妻拓氏張廷言妻閔氏胡
增福妻薛氏程繼世妻王氏郭春全妻許氏荆作楨
妻翟氏杜如密妻張氏孟仕齊繼妻常氏梁康魏妻

劉氏李全敬妻荆氏李繼緒妻孔氏張士秀妻龍氏
王佐臣妻衛氏袁春奇妻李氏梁邦楨妻賈氏裴得
福妻陳氏閔涑妻陳氏孫守貫妻趙氏羅緯妻陸氏
高自先妻路氏何昇妻景氏岐豐亨妻尹氏陳克容
妻趙氏王化龍妻楊氏王作霖妻李氏解清妻李氏
張三希妻李氏岐建猷妻邱氏程藝妻張氏陳大受
妻李氏張泰春妻王氏路爾詮妻張氏介元亮妻馬
氏龍養鱗妻解氏令狐禹基妻何氏馮養信妻陳氏

王克遜妻李氏令狐先圖妻雷氏岐開敏妻張氏張
延敬妻趙氏李全忠妻郭氏張從仁妻侯氏張從禮
妻喬氏孫淑禹妻胡氏陳應明妻令狐氏孫安楚妻
何氏杜繼秀妻紀氏王克弘妻胡氏何顯儒妻閔氏
程有弘妻李氏郝進秀妻令狐氏曹繼唐妻杜氏邵
晟妻管氏杜周林妻荆氏陳大有妻王氏楊廣妻荆
氏李天良妻賈氏程振法妻高氏曹希先妻柴氏穆發
才妻張氏李鱗照妻趙氏喬于洽妻張氏錢賜福妻

王氏郝壯聞妻邱氏杜弘度妻張氏劉高科妻王氏
衛得良妻何氏陳淑妻鄧氏褚含經妻王氏薛雲吉
妻楊氏裴均晉妻景氏翟朝璋妻王氏王道中妻楊
氏石南玉妻任氏關文斗妻于氏以上俱守志節

萬泉縣

金

王海妻廉氏全女年十七適王生子甫週夫歿奉姑撫
子終身不二大定四年旌表

元

呼蘭圖妻周氏其先上蔡人呼蘭圖從軍江漢歿於王事
氏守義撫孤享年八十而卒

明

生員楊喬妻史氏年二十四夫故三年未嘗見齒奉姑
甚孝姑年九十三不能動履朝夕侍奉無怠姑歿葬
盡禮有羣鶴遶於其宅咸謂節孝所感事聞旌表

李軌妻暢氏軌任南康府照磨正德中流寇陷城守臣

以下皆遁軌獨偕子死難氏亦死焉

孫清妻王氏生二子夫故撫孤守節夫弟亦故遺一子
撫如已子比長均業授之里稱賢節

張氏雙節義民張宗漢之二女長適王尚志次適吳告
君胥早寡守志以壽終

董廷接妻衛氏年十八而寡無子女家貧如洗勵節六
十餘年當道咸加存卹

薛陵妻牛氏薛應滂妻李氏賈勝妻張氏生員閔文妻

王氏劉仁妻孫氏高應科妻李氏以上俱守志節

國朝

王貞女王昌祉之女年十六父母偕出里中兒薛進喜窺其獨處逼污之女不從被殺維時鄰幼女有竊見之者微露其端倪邑令瞿亮邦讞獄無異論進喜如律康熙三十六年建坊旌表

楊月蘭妻解氏年十八性貞淑動循禮法月蘭表姪董胎子往來其家氏以至親畜之會月蘭賈於外解獨

居胎子乘夜入氏寢犯以非禮氏持甕奮擲胎子奪甕還擊氏身無完膚血漬牆屋間叫呼之聲不絕胎子遂斷其頭而遁知縣鄭章廉訪得實斃胎子於獄表氏墓曰節烈解氏之墓

訓導王守身繼妻李氏子特遴妻張氏早寡胥以撫孤守節終

生員賈之麟妻劉氏年十九夫亡無子女矢志患臂疾家人命醫治之氏曰寡婦之臂可令人視耶竟

以疾終

生員屈愈昭妻吳氏愈昭早喪鮮昆季無子女二老在堂氏忍死奉養痛翁無祀鞠伯翁幼子存繼翁系

牛拱薇妻王氏子射斗妻張氏姑媳孀居志操如一

范繼正妻董氏年二十七夫亡子夭值歲凶絕糧無策鄰女有市髮作髻者氏剪髮易粟以膳二人自拾青棗剝樹皮食之奉養歷二十年士民咸頌其節孝

杜茂新妻暢氏薛國瑚妻李氏王家礎妻賈氏張心誠

繼妻李氏薛綿瑄妻蔚氏賈彭年妻董氏費自省妻
黃氏李自新妻王氏王穀躅妻薛氏趙賓周妻賈氏
吳方亨妻賈氏衛帝股妻張氏李五猷妻姚氏孫光
耀妻李氏以上俱守志節

滎河縣

唐

薛氏汾陰人道衡女楊炯薛振行狀神堯媿好河東郡
夫人公之姑也每侍高宗詞翰高宗嘗顧曰不見媿

好經數日便謂社稷不安其見重如此

林氏濟南人隰城丞薛元曖妻也元曖早卒林博涉五
經有母儀令德訓其子彥國彥輔彥偉彥雲及姪據
總播並登進士第衣冠榮之

韋氏京兆人吏部侍郎溫女適汾陰薛蒙工屬文績曹
大家女訓行於世

元

張益妻楊氏克修婦道勤於女紅未幾舅姑與夫相繼

歿守志終身大德八年旌表

明

趙立妻張氏年二十餘夫故戚容垢面苦節四十一年
弘治元年旌表

樊清妻吳氏年二十二夫亡事舅姑撫幼子孀居三十
五年正德十一年旌表

生員馮信妻蔡氏年二十四夫亡子學甫六歲守節四
十九年嘉靖十四年旌表

劉遵義妻田氏年十九夫亡誓不改嫁教子成立嘉靖
間旌表

武應舉妻盧氏莊靜有女德年二十夫歿矢殉父母慰
止之貧無所贍寄居母家紡績自給歷四十年卒萬
歷間旌表

蔡澄紀妻潘氏年十九夫亡生子甫一月矢志守節歷
年八十事聞旌表

張自立妻武氏年二十三夫亡父母欲改嫁之引刀自

決繪夫像敬事終身事聞建坊旌表

盧國治妻潘氏夫邁病數年侍奉不少急比卒氏年二十四比操金石享壽八十事聞旌表

生員郭九韶妻李氏年二十夫故矢節撫孤天啟四年旌表子俊彥預恩薦授通渭令氏封太孺人

郭建極妻孫氏年十七闖亂匿崖下穴中賊搜得之見氏有姿色引其手氏奮力脫臂投崖死

國朝

潘印昌妻周氏年十九夫亡無子撫姪守志當事旌其
閭歲給粟帛

生員李盈院妻杜氏年二十夫亡氏擗踊號慟誓以死
殉潛縊柩前

生員丁繼美妾趙氏繼美年老無子娶氏生子甫三月
繼美亡氏立子撫孤外侮叢集志不少挫


崔汝寬妾王氏年十九汝寬卒氏痛哭曰主之娶我也
以無子我之不死也以有娠暨後生子呈嵐苦節撫

孤卒綿夫祀

張五綱妻崔氏姜寇變潛匿高密賊入牽之氏不受辱
投百尺崖而死時年二十歲

侍郎李嵩妾林氏嵩病劇氏即絕粒嵩卒縊死於棺側
生員聶雲翊妻李氏吳承鼎妻馬氏潘宗文妻王氏范
芬妻潘氏樊養智妻陳氏樊宏允妻白氏生員張輝
妻李氏陸衍妻楊氏生員潘毓麟繼妻郭氏生員丁
夢弼妻茹氏陳嘉謨妻韓氏王宴妻陳氏黃瓚妻謝

氏黃秉仁妻趙氏陸進妻潘氏潘逢浪妻武氏郭維
新妻茹氏張自儉妻潘氏薛自蘭妻王氏王洪薦妻
張氏張廷珍妻蔡氏樊焯妻聶氏吳作聖妻樊氏茹
鳳栖妻趙氏郭運周妻潘氏郭翰箴妻王氏以上俱
守志節



山西通志卷一百五十五